

# *MOTO OYO AZALI KOKÍMA*

## *LONGWA NA BOZALI NA NKOLO*



Tógumba mitó. Nzambe Molingami, tozali na esengo nsima ya nzángá oyo mpo na litomba oyo tozui, ya kosangana elongo mbala moko lisusu. Mpe bobele Yo, Nkolo, nde oyebi ndenge mitema na biso ezalaki na mposa makasi mpo na ngonga oyo, ntango tokoki lisusu kotelema liboso na libota na Yo awa, mpe komema Nsango oyo toyóki ete ezali na bomoi mpenza mpe ezali ya nokinoki, na ngonga oyo. Osili kopesa biso mwa mikolo oyo sikoyo, mpe tobondeli, Nzambe molingami, ete loboko na Yo ya mawa ézala likoló na biso, mpo na kokamba biso mpe kotambwisa biso. Mpe pesa biso biloko oyo tosengeli na yango, Nkolo, mpo mitema na biso ezali na mposa makasi ya koyeba Yo malamú koleka.

<sup>2</sup> Tozali komona elanga monene ya kobúka mbuma, ekomi mpembe, ekembi, mpe toyebi ete mbuma ebelemi sikawa mpo na ntango monene ya kokabola mbuma ná matiti. Nzambe molingami, tobondeli ete Ófungolela biso mposa oyo ezingi biso, tika ete tópema Liboso na Mwana sikawa, na mwa mikolo oyo ezali kolanda, mpo tókomela mpo na Bokonzi na Nzambe.

<sup>3</sup> Pámbole loyembo nyonso ekoyembama. Pámbole libondeli nyonso, mpe yanóla na moko na moko oyo ekobóndelama, Nkolo. Bikisa babúngi nyonso. Zóngisa na ndako ya Nzambe na bomoi, mpe na bondeko, baoyo basili kokende mosika.

<sup>4</sup> Tobondeli, Nzambe, ete Óbikisa mobeli moko na moko oyo akoti na nse ya motóndo na biso. Sala yango, Nkolo. Tika ete moto na bolembu ata moko te ázala na kati na biso na nsuka ya mayangani oyo.

<sup>5</sup> Mpe, Nzambe molingami, na bongo, mpo na biso moko, biso baoyo tolobaka, na ngonga oyo, ete tozali Lingomba, baoyo Babéngami kobima, baoyo, na mokili mobimba, basili kobima longwa na Babélé mpo na kozala bazui ya bondeko kitoko mingi oyo, na mokolo oyo ya nsuka, tobondeli, Nzambe, ete Ópambola mitema na biso mpenza na ndenge esengeli. Tozali solo na nzala, Nkolo, mpe tobimisi biloko nyonso ya mokili, na boyebi na biso nyonso. Nkolo, totii pembeni mikumba nyonso oyo ekangaka biso na petee, mpe sikawa tika ete tópotá mbangu oyo etiami liboso na biso, na motema molai. Sala yango, Tata. Mpe tika ete tókoma Baklisto oyo batondi koleka, ya makasi koleka, ya malamú koleka, na nsuka ya liyangani oyo, koleka ndenge tozalaki ntango tokotaki. Tika ete Nzambe ázua nkembo nyonso, mpo tosengi yango na Nkombo na Yesu. Amen.

<sup>6</sup> Nakanisi ete oyo ezali litómba monene, na mpokwa oyo, oyo nazelaki ntango molai. Mokolo mosusu wana, nazalaki koyebisa mwasi na ngai, nalobaki: “Nakómaka motema likolólikoló mingi, kozeláká kokóma na tabernacle.” Na . . . Nazali na baninga mosusu, solo, nazalaka na bango, na mokili mobimba, kasi ezalaka na eloko mosusu moko na ntina na tabernacle oyo.

Nazuamáki na mputulu oyo na zingazinga awa, ntango Nzambe apesaki ngai bomoi awa na mabelé; mpe nabanzi ete, soki Aumeli, nakokundama awa, esika moko boye. Ntango Akoya, Akokuta ngai awa, esika moko boye.

<sup>7</sup> Kasi, emonanaka lokola ezalaka na eloko moko, ntango nabandaka kokanisa na ntina Jeffersonville. Mokolo mosusu, namiyokaki mpenza ngai moko; nalobaki na mwasi na ngai, nalobaki: “Nakomi na mposa ya kozonga ndako mpe nayebi te ntina nini nakomi na mposa ya kozonga ndako, longola kaka ézala bato oyo bazali kobondela mpo na ngai.” Nalobaki: “Malamu, nako . . . Eloko bobele moko nasengeli kosala ezali kozonga mpe kozala na mwa mikolo ya mayangani, kotala soki tokoki kozua te eloko moko uta na Nkolo, ntango mosusu Alingi ete tóyeba likambo moko.”

Mpe liteya monene ya motuya mpenza, oyo ezali liboso na biso sikawa, ezali *Libala Mpe Koboma Libala*. Mpe soki motuna moko ezali, eyano moko esengeli kozala. Motuna ekoki kozala te, soki eyano ezali te. Ata ezali eloko nini, eyano moko esengeli kozala. Soki Nkolo alingi, nakolinga komeka kolobela yango, mokolo ya Lomingo na ntongo.

<sup>8</sup> Na bongo, lobi na mpokwa, nakanisi ete tosengeli kozala awa na . . . Eteyelo yango nkombo na yango nini? [Ndeko Neville alobi: “Parkview.”—Mok.] Auditorium ya Parkview. Nini, mesié? [“Ecole Secondaire Parkview.”] Ecole Secondaire Parkview. Bato boni bayebi esika yango ezali? Malamu, nabanzi ete baktoria bilembo, boye te, Ndeko Neville? [“Iyo.”] Kozala . . . Ezali kaka likoló awa, pene na—pene na kilomètre moko, mpe elembo moko ekotiana wana. Okatisi, otiki nzela. Ezali ndako moko kitoko, ya molai. Ezali na bisika oyo okoki kofandisa loboko, mpe kokoma nyonso bolingi kokoma, mpe—mpe—mpe nyonso wana. Mpe nandimisami ete bokosepela na yango mwa mingi koleka ndenge bokokaki kozala, mwa kofinana na mayangani oyo ezalaka awa na—na tabernacle. Bisika ekozala mingi, bisika mingi mpo na mituka.

<sup>9</sup> Sikawa, nakanisi ete bazali na mwa mobeko moko, oyo esengelaki na biso kolaka ete tokotosa yango, ezalaki ete, tosengeli kokóma na lopango yango te liboso na ngonga ya motoba na ndambo. [Ndeko Neville alobi: “Liboso na ngonga ya mitano na ndambo te; tosengeli kokoma kuna liboso na ngonga ya mitano na ndambo te.”—Mok.] Mpe ngonga nini . . . [“Bikuke ekofungwama na ngonga ya motoba na ndambo.”] Nandimi ete

ekozala likanisi ya malamú ete tókoma kuna na ngonga ya motoba na ndambo.

Sikoyo, bazali na auditorium mosusu awa na engumba, oyo eyambaka bato nkóto motoba. Soki tokomikamba malamú na oyo, bakoki kopesa biso oyo mosusu, mokolo moko, mpo na liyangani ya monene, ntango mosusu mokolo moko, na eleko ya mói makasi oyo ntango nakouta na mikili ya bapaya.

<sup>10</sup> Boye, nakanisi tokoki kofandisa bato ata . . . Tokoki koyamba bato boni kuna? [Ndeko Neville alobi: “Tokoki koyamba pene na bato nkóto minei.”—Mok.] Nkóto minei. Boye, bomoni, tokozala na bisika mingi. Ntina ya kowela ekozala te. Boye, bókoma na ngonga ya motoba na ndambo. Na bongo, bato nyonso bakoki kokóta na ntango oyo esengeli, bato nyonso elongo, mpe nandimisami ete boko—bokofanda malamú. Mpe etómbwamá *boye*, mpe—mpe esika moko awa, epai okoki kokoma ná kozua ba-note mpe nyonso wana. Mpe ekobanda, soki Nkolo alingi . . .

<sup>11</sup> Nakanisi sikawa, na mpokwa oyo, lokola oyo ezali liyangani ya mabondeli ya mokolo ya Misato na mpokwa, tozali na . . . Esika oyo ezali ya kotonda, boye, nakanisi ekozala ntango mosusu malamú tóbanda lobi na mpokwa. Tofutelaki yango na elikia ete, ntango mosusu, soki bato bakoleka mingi awa, tókoka kokende kuna. Kasi nabanzi ete ezali . . . ekozala malamú ete tókende kuna, omoni bongo te, Ndeko Neville, ete tókende kuna mbala moko lobi na mpokwa? Bato boni bamoni ete ekozala likanisi ya malamú? Na bongo bokozala na—na bisika mingi ya kofanda. Esili—esili kofutamela; efutami na mwa bandeko awa na losambo. Tofuti kaka dollars ntuku mitano na mpokwa moko, ezali mpenza, mpenza . . . Elingaki kozala malamú soki ezalaki bongo bisika nyonso, tokokaki kofandisa bato mingi bongo na dollars ntuku mitano na mpokwa moko, ezali ndako etongami sika mpenza, ná eteyelo ya kitoko. Mpe, kasi tozali . . .

<sup>12</sup> Na bosolo, tokozua makabo, nabanzi. Tolingi te ete mibali yango báfuta yango bango moko; tokofuta mpo na . . . tokozongisela bango mbongo yango. Kasi ntango tokokokisa mbongo oyo tofuti mpe nyonso wana, ee na bongo, ya solo, tokotika kozua makabo. Bisó . . .

<sup>13</sup> Soki bapaya bazali elongo na biso, tosili kokomisa yango ndingisa, ya kosenga-senga mbongo ata moke te, kolómba, kotindika bato na makasi mpo na mbongo. Tolekisaka ekoló ya makabo, oyo ezali kaka . . . Ezali eloko esalemaka na losambo. Namekaki yango, mbala mingi, ete nálekisa ata ekoló ya makabo te, ata moke te, kasi esímbaka te. Bomoni? Mpo, kopesa ezali eteni ya losambo na biso. Ezali eteni ya lotómo na biso. Etali te soki ezali kaka ba-centime zomi, to soko eloko nini, to centime moko, yango nde nyonso oyo . . .

<sup>14</sup> Boye bozoyeba lisusu, Yesu amonaki mokufeli—mobali moko koleka, mokolo moko, epai oyo bato ya mbongo bazalaki kotia

mingi na bozui na bango na ebombelo-misolo. Mpe mokufeli-mobali oyo alekaki wana, ntango mosusu azalaki ná bana mibale to misato ná nzala, kotambola na ngambo na ye, mpe apesaki nyonso oyo azalaki na yango, ba-centime misato. Mpe Yesu alobaki: “Nani afutaki mingi koleka?”

<sup>15</sup> Sikawa, soko názalaka ya kotelema wana, nalingaki koloba: “Kosala bongo te, ndeko mwasi. Bisó—bisó, tala, bisó tozali na mbongo ebele.” Kasi Apekisaki ye ata moke te. Bomoni? A—Ayebaki ete Abombelaki ye eloko ya monene koleka, na nsuka ya mobembo. Boye, bomoni, nsima na nyonso, azuaki ndako na Nkembo, esika azalaki kokende. Mpe Ye atikalá kopekisa ye te. Atikaki ye átia ba-centime na ye misato, mpamba te azalaki na mposa ya kosala yango. Mpe asengelaki kozala na mposa ya kosala yango; ná bana, mpe mokufeli-mobali, bobele ná ba-centime misato ya kobikela na yango. Ye mwasi yango asengelaki mpenza kozala na mposa ya kosala yango. Boye, bomoni, ntango bato bazali na mposa ya kopesa, bosengeli kopesa bango libaku ya kosala yango.

<sup>16</sup> Kasi nazali kokanisa na ntina na baoyo batelemaka wana, mpe bato oyo balobaka: “Nani akopesa dollars ntuku mitano? Nani akopesa dollars ntuku mibale?” Nabanzi wana ezali mbebá mpenza mpo na—na mayele na yo. Na—nabanzi ete bato bayebaka ete esengelaka na mbongo mpo na—mpo na kosala li—liyangani. Mpe nakotiká ata moke te ete bayángeli-misolo básala yango. Nalobaki: “Ntango nyonso oyo bokosengela kosala yango, na bongo, ekozala ntango mpo na ngai kozonga na tabernacle. Boye, tokozala na ntina ya kosala yango te.” Kasi na—nakanisi mpenza ete tosengeli kolekisa ekoló ya makabo, mpo—mpo losambo ézala mobimba.

<sup>17</sup> Boye, ntango mosusu bakolekisa mwa saani ya makabo mpokwa nyonso, bakoloba, ndakisa: “Malamu, tokozua makabo sikawa.” Mpe bakolekisa saani ya makabo, mpe eko—ekosuka wana.

<sup>18</sup> Mpe na mpokwa nyonso, soko Nkolo alingi, nakanisi ete Nkolo atii na motema na ngai Liteya moko ya sikisiki mpo na Lingomba. Nalekisi mikolo mingi na mabondeli. Kasi nakokóta na yango te, mpo likambo moko ya monene esalemaki mokolo mosusu wana, oyo ezalaki mpenza monene. Mpe nazali na mposa makasi ya koyebisa bino yango. Sikawa, liteya ya motuya koleka, nabanzi, oyo bato mingi kati na bango bazalaki kobenga, ndenge Billy alobaki, ezalaki na ntina na *Libala Mpe Koboma Libala*. Yango, ezali li—likambo moko ya motuya monene, mpe na—nayebaki te lolenge ya kobanda yango. Mpe nakendeki kobondela mpo na yango, mpe Nkolo akutanaki na ngai. Mpe nayebi ete na, na, na nzela na . . . nazali na yango te, kasi Nzambe asili kopesa ngai yango; nazali na yango sikawa. Nzambe asili kopesa ngai eyano oyo esengeli, bomoni, bomoni, mpe na—nayebi ete ezali solo.

<sup>19</sup> Boye, nayebi naino malamumu mpenza te, ntango mosusu, mokolo ya Lomingu nakoki kosenga na bandeko na biso ya basi báya na losambo te, kaka bango, kasi na—nayebi te. Ekotalela soko basi oyo babálá bakolinga koya elongo ná mibali na bango. Ezali—ezali na makambo mosusu ya motuya mpenza, oyo esengeli kolobama, bosolo na yango, mpe lolenge. . . Boye, tolingi mpenza koloba yango polele, na YANGO ELOBI NKOLO, na bongo bokozua yango na ntango wana. Na bongo, bokoyeba mpenza oyo Solo ezali. Mpe nazotia motema na Ye mpo na kosala yango.

<sup>20</sup> Mpe, sikawa, nazalaki awa na esika ya kolia, mokolo mosusu, nazalaki kolia, mpe—mpe Jerry ná bamosusu bazalaki koluka bino nyonso. Balobaki, balobaki: “Malamu, biso. . .” Baike, moko na bana mibali yango azalaki wana, alobaki, moninga oyo alobaki: “Nakozala mpenza malamumu na mpóso oyo,” alobaki, “bazali na. . . To, mposo mibale oyo.” Alobaki: “Bazali na li—liyangani moko awa, ya basketball, to eloko ya ndenge wana.” Alobaki, bongo alobaki: “Branham azali kuna, akosala liyangani moko.” Alobaki: “Nakoleisa eboke ya bato mingi mpenza.” Na Ranch House, moko na bisika ya kolia wana. Mpe bazalaki. . . bazalaka bato malamumu mpenza.

<sup>21</sup> Mpe nasepelaka na bino nyonso, mpamba te bakumisaki bino mpenza mpe balobaki makambo ya malamumu na ntina na bino.

<sup>22</sup> Moyangeli kuna na Ranch House akutanaki na ngai mokolo mosusu na ntongo. Nakómaki na ntongo na ngonga pene mibale ná ndambo, longwa na Arizona. Mpe alobaki: “Malamu, Ndeko Branham,” alobaki, “nayoki ete okosala mayangani mosusu.” Alobaki: “Nabakisi bato ya mosala mosusu,” alobaki. Mpe alobaki: “Na bongo, nalingi koloba likambo moko, ete bato oyo bautaka kuna,” alobaki, “bazali mpenza bato malamumu.” Sikawa, esalaki ete námiyoka malamumu mpenza, na ntina na bino, bomoni.

Mpamba te, nsima na nyonso, namiyokaka mwa moke lokola bozali bana-ntaba na ngai, mpe na—na, to bana, kutu nde. Boye, na. . . *Kid* ezali mwana ya ntaba, mpe bino bozali ba-ntaba te. Bozali bana-mpate na ngai. Ezali ndenge nini? Bozali bana-mpate ya Nkolo, oyo Apesi ngai nzela ya koleisa. Mpe natii motema ete eko—eko. . . ete Akopesa ngai nzela ya kosala yango. Tozokóba na nzela kokende liboso.

<sup>23</sup> Mpe na ntina na *Libala Mpe Koboma Libala*, nalingaki kolobela yango banda ntango ya Bilembo Nsambo wana. Boyebi, libomb-. . . Mabombami nyonso esengelaki koyebana kati na yango, na kofungolama ya Bilembo Nsambo yango, mabombami nyonso ya Biblia. Mpe nazokanisa sikawa, lokola nabandi kokoma mobange, na—nakanisi na. . . Nakanisaki ete ekozala malamumu ete nátia yango na bande, mpo soko likambo moko ekomeli ngai, na bongo Lingomba ekoki komituna: “Tozomituna

nini azalaki na yango na likanisi na ye. Alingaki koloba nini?” Mpe mateya nyonso oyo emonanaka lokola makasi mingi; Nakanisi . . . na lisungi ya Nkolo, nakomeka koteya bino yango. Na bongo—na bongo soko likambo moko ekómi, mpe soki esali ete nákende liboso Ye áya, boye boko—bokozala na yango na bande.

<sup>24</sup> Nakanisi tozui ba-buku ya sika oyo ebimi. Namoni Ndeko mwasi Vayle; nayebi te soko docteur azali awa to te. Azali awa, Ndeko mwasi Vayle? Ntango mosusu azali na kati ya liyangani. Nazomona ye te. Kasi, oh, iyo, kuna na nsima. Mpe Ndeko Vayle akomi buku moko, mpe ezali . . . Nakanisaki, nabanzi balobaki lelo ete, ezali mibale. Ndeko Vayle, ezali bongo, ozali na yango mibale awa sikawa? Ba-buku mibale. Sikawa, nayebi te, ngai . . . ndenge oyo ngai nasosoli, ezali ete moto nyonso akozua moko. Boye, ngai . . . Soki bino . . . Nde ndenge oyo ngai nasosoli. Nakoki kozala na libunga na likambo yango.

<sup>25</sup> Na bongo *Bileko Nsambo Ya Lingomba* mpe esili (Ezali bongo, Ndeko Vayle?) mpe ezotiamana na masini ya kobimisa mikanda sikawa. Mpe nayebi ete bokolinga kozua yango, mpo ekoyanola mituna mingi oyo ezali na mitema na bino. Bongo, nsima na yango, malamau, tokomeka kokómisa *Bilemo Nsambo* bifungwami, boyebi, na lolenge ya buku, mpo moto nyonso ákoka kotángana yango na lolenge oyo bango—oyo bango balingi, bakoki kososola mpe koyekola yango. Nakanisi ete na ntango esili kokomama, soki e . . .

<sup>26</sup> Liboso, tozuaki yango mbala moko longwa na bande, ndenge ekomamaki, to elobamaki. Boyebi, okoki koteya liteya, ezali eloko moko, na nsima, kokoma buku ezali eloko mosusu. Bomoni, ndakisa, nakoki koloba likambo moko likoló-likoló, ndenge nazali koloba na bino, bokoki kososola, nakoki koloba: “Sikawa, momboto na nyoka,” bomoni.

Malamu, sikawa, motángi ya buku yango, soki olongoli yango, akomituna: “Momboto na nyoka ezali nini?” Bomoni? Bakoyeba te. Soki esalemi ete ekómi na esika moko lokola Princeton to esika moko boye, mpe bango—bakokanisa tozali bato bazangá mayele.

Boye, nazuaki Ndeko Vayle mpo ásungana ngai mwa moke na yango mpo na kolanda likanisi moko, mpe kobongisa gramere na yango. Nandimisami ete na gramere na ngai, bako . . . Ekozala libombami mpo na bango, solo mpenza. Boye . . . Ndeko Vayle azali mpenza malamau na likambo yango, boye azali lokola . . .

<sup>27</sup> Na bongo, na oyo wana, nakanisi ndeko na biso ya motuya, asengelaki kozua mwa mpemela mosusu, na ndenge moko to mosusu, mpe alobaki ete akokoma buku mibale to misato ya ye moko, uta na yango, lokola. Boye, akomaki moko, nkombo na yango, nabanzi *Mosakoli Ya Ekeke Ya Ntuku Mibale*, mosusu, *Lingomba Ya Laodikia*, nabanzi, to eloko moko ya ndenge wana.

<sup>28</sup> Mpe Billy ayebisaki ngai ete, na mpokwa oyo, nabanzi, ba nkóto na yango ekómi lelo; moto moko ayaki na yango uta na Texas. Na bongo, ekozala awa. Mpe bakopesa liyebisi yango, nakanisi, ézala montango nini. Nakanisi ete esili kofutama. Nayebi mpenza te. Mpe soko ezali bongo, ekopesamela bino, bomoni, mpe, ya ofele. Mpe tozolikia ete bokosepela na yango. Soko bosepeli na yango, bópesa mbote ya loboko na Ndeko Vayle kuna na nsima mpe bóyebisa ye ete bosepeli na yango mpenza. Natikálá kotánga yango te, ngai moko. Soko nátangaka yángo, nakokaki kobongola likanisi na ngai na ntina na yango, boye nakomeka kotanga yango na mpóso oyo ntango nakozua libaku, soki nakoki.

<sup>29</sup> Sikawa lokola tozali mokolo ya Misato na mpokwa, mayangani na biso ekobanda mpenza lobi na mpokwa. Kasi nakanisi, lokola nazali awa katikati na bino, Na—na—nakokaki mpenza te kotikala kuna na ndako mpe—mpe koyeba ete bino nyonso bozalaki awa. Na . . . Ezali lokola, boyebi, lokola bandeko na yo moko boye bayei, boyebi, mpe okei mbangu na nsuka ya nzela mpo na kokutana na bango, boyebi. Mpe—mpe na—nakanisaki ete nakoya na lombangu mpo na—mpo na koyamba bino na Jeffersonville. Na boye, na mpóso eleki, na . . .

Te, bolimbisa ngai, eleki pene na mpóso misato, nazongaki awa. Nakendeki kuna komeka ko. . . Nazalaki na mwa mayangani na Arizona mobimba kuna, mpe nazongaki mpo na komeka kopema. Nakendeki na mobembo ya bokila, mpe na—nazuaki nkosi ya monene koleka ya etuka ya Arizona. Nalandaki ye kilometre ntuku misato na mibale na kati ya zamba mpo na kozua ye.

<sup>30</sup> Kasi na bongo kokanisa, ata bongo, ete natikálá kokanisa te ntango nazalaki elengé mobali. . . Kaka mpo na kotalisa ndenge makambo oyo esálemaka, mwa esika oyo Nkolo apesaki biso kuna, mpo na ba—sanza oyo tozalaka kuna, mpe kelasi mpo na bana.

Nazalaki mwana moke ya mobali. Nabanzi Jimmy Poole azali awa na mpokwa oyo, ntango mosusu tata na ye azali awa, Engambe Jim. Tokendeki kelasi elongo, mpe nazoyeba lisusu ntango nafandaki wana, lokola mwana moke ná bilamba ya kopasuka, ná sapato, nalataki sapato ya tennis, ná misapi ya makolo libanda; nadelaki lokasa epai ya mwana moko, mpe ekomeli na mosusu.

<sup>31</sup> Nazaláká kokoma ba—poéme. Mpe Mme. Wood, awa, asengaki ete nátanga yango, nsima ya nzánga oyo na bande, na ntina na Ford na ngai ya kala, boyebi, ezali—ezali na yango mabe te. Sikawa, alobaki: “Malamu, osengelaki kotindela yango Mr. Ford.”

Nalobaki: “Ezali na bosolo mingi mpenza, nabanzi,” na ntina ná liboso moko eninga—ninganaka, nsima esalaka makelele,

mpe yenda lokola puzzle ya ki-Chinois. Kasi na... Ezali—ezali... Kasi nalobaka ntango nyonso, likambo kaka moko oyo nasengelaki kosala ezali kotánga ba-pine minei, mpe koningisa yango makasi mpo na kopelisa yango mpe kokóta na kati. Nazalaki koloba: “Ezalaki malamú ntango nazalaki komata na mwa ngomba ná yango, ebandaki kokende malembe mpenza, koloba: ‘Nakanisi nakoki, nakanisi nakoki, nakanisi nakoki.’ Bongo, na ngámbo mosusu, ebandaki koloba: ‘Nakanisaki nakokoka, nakanisaki nakokoka.’”

Na lolenge wana nde bamataka mwa ngomba yango, lokola na buku ya *Mobembo ya Moleki-nzela*. Na bongo biso...

<sup>32</sup> Nazalaki na mwa poéme moko oyo nakomaki, eloko moko ya ndenge wana. Elobaki... Sikawa, bókanisa naino, nazalaki kaka na mibu pene na zomi na mibale. Mpe nazalaki ya kotelema kuna, mokolo mosusu, kotaláká canyon wana, mpe nazalaki kokanisa: “Nkosi yango ekotiama awa, na bureau oyo, ekozala kotala libanda na lininisa,” na lininisa moko ya talatala. Nazalaki kokanisa poéme moko ya moke. Nazongaki mpe nazuaki yango, eloko moko lokola oyo. Bókanisa kaka ndenge Nzambe...

<sup>33</sup> Bondimi ete Nzambe azalaka na kati ya mpemela nyonso? Nzambe asengeli kokoma loyembo. Bondimi ete Nzambe azalaka na kati ya nzembo? Yesu alobaki bongo. Alobaki na ntina na Dawidi ete: “Boyebi te oyo Dawidi alobaki na Nzembo? Boyebi, ezali te...”

<sup>34</sup> Bótala likambo mpenza ya kobakama na ekulusu. Dawidi ayembaki yango, na Nzembo ya 22: “Nzambe na Ngai, Nzambe na Ngai, mpo na nini Otiki Ngai? Mikuwa na Ngai nyonso ezali kotala Ngai. Batoboli matandu na Ngai mpe makaká na Ngai.” Boyebi, mpe ezalaki loyembo. Nzembo ezali—ezali loyembo.

<sup>35</sup> Na poéme oyo, bótala ndenge ekokisamaki. Nafandaki wana, mwa mwana moko moke ya mobólá, ná eteni ya lokasa ya kodéfa, nalobaki:

Nazali ngai moko, oh, ngai moko mpenza,  
mosika, na súdi-westi wana,  
Esika bililingi bikweaka na bozindó koleka  
likoló ya mokaka ya ngomba.  
Nakoki komona mbwa ya zamba abatami na  
kati ya londende motané,  
Nakoki koyoka lóbo kolela na esika ba-ngombe  
ya maseké milai baliaka matiti.  
Mpe esika moko likoló na canyon nakoki  
koyoka nkosi kolela,  
Mosika na ba-Ngomba ya Catalina, na ndelo ya  
Arizona.

<sup>36</sup> Mibu ntuku minei na nsima, nafandi wana mpenza na canyon yango, nkosi yango azali kotala ngai na miso.



E Nzambe, Mboka moko ezali na ngámbo ya ebale esika moko boye, baninga. Ezali kaka... Esengeli kozala kuna. Bomoni? Ezali na—makambo ebele ezali koloba na ntina na yango. Makambo nyonso oyo ezali kaka masapo te; ezali... Ezali solosolo. Ezali bosolo. Nazali na esengo mingi ya kozala awa na mpokwa oyo, kozala elongo ná bato oyo nazotalela kobika elongo ná bango na ngambo Kuna libela na libela, esika bokono, to liwa, to bokabwani ekozala lisusu te. Mpe mobembo ekozala eloko ya mpasi te mpo na biso, na ntango yango.

<sup>37</sup> Sikawa, nakanisi ete liyangani moko te ekoki kozala mobimba, kozanga kotánga Liloba mpe kozala na mwa... .

Ndeko Neville, nauti kokoma awa. Billy alobaki ete olingaki ete náloba. Ezali bongo, Ndeko Neville? [Ndeko Neville alobi: “Amen. Iyo. Ya solo.”—Mok.] Ntango mosusu nazuaki yango lokola epesameli ngai, kasi na—namiyokaki mpenza malamumu mpo na yango.

Boye, sikawa, bino baoyo bozali na ba-nzembo mpe bongo, bómona Ndeko Neville mpo na ntango nini bokoyemba, na bongo, bakosála yango, kuna. Tokozua pene na ndambo ya ngonga na ebandeli, mpe tókota nokinoki na Mateya oyo ya bozindo mingi mpe tomona oyo tokoki komona ete Nkolo akosala. Mpe natii mpenza motema ete... .

<sup>38</sup> Na—nandimi ete tozali na Solo. Nasepeli na yango. Nandimi ete blé ezali, mpenza mpenza, mposo ezali kokabwana ná yango. Boyebi. Mpe, bomoni, nakoki koloba yango mwa moke na ebandeli, lobi na mpokwa, bomoni, ndenge mposo ezali kokabwana ná blé. Kasi blé esengeli komitia Liboso na Mwana, mpo na kokemba. Yango nde ntina oyo tozali awa, moninga, tíkala Liboso na Mwana kino etóngá moke na biso oyo ezali awa, kino ékemba mpenza mpo na Klisto na lolenge ete ékóma lipa na mesa na Ye. Yango nde eloko oyo nalingi ete ésalema.

<sup>39</sup> Mpe sikawa liboso ete tóbelema na Liloba, nsima na kotanga ba-poéme, mpe nyonso wana, tóbondela lisusu. Bongo tokozua nkomá na biso.

<sup>40</sup> Molingami Yesu, sunga biso na mpokwa oyo sikawa, na maloba moke oyo, wana tozali kotalela Yo. Mpe tobondeli ete ngolu mpe mawa na Yo ézala elongo na biso, Nkolo. Mpe komisa mitema na biso petepete; longola bamposo, banzúbe mpe bansende nyonso, tika ete pole epambolami ya mói ya Nzambe ékita likoló na Liloba, Nkolo. Mpe tika ete tózala na liyangani moko ya monene mpenza kino moto moko te katikati na biso ázánga kobikisama, bana nyonso bakokota na Bokonzi na Nzambe. Baoyo bazangi libatisi ya Molimo, tika ete báyamba Yango, Tata. Tika ete mabombami ya minene nyonso oyo tosengeli koyeba na eleko oyo, Nkolo, émonisamela biso; mpe tokomóna Nzambe na polele nyonso, mpo tóyeba ndenge ya komikamba mpe kosala, komisembola mpe komema binamá ya

nzoto na biso na botósi ya Liloba, mpo tókoka koyeba ndenge ya kobika na mokolo oyo, wana Nkolo Yesu azali kobeleva.

<sup>41</sup> Wana ekotanga ngai Liloba na Yo na mpokwa oyo, Nkolo, lokola natánga mingi te, ekoki kosalema ete natánga na maloba mosusu, mpe ntango mosusu koloba maloba mosusu malamute. Kasi, Nkolo Nzambe, kaka Yo nde okoki kobimisa ndimbola kouta na yango. Bobele Yo nde okoki kosala yango. Lolenge moko te—moko te ezali mpo na moto ákoka kosala yango; ezali na maboko na Yo nde, Nkolo. Boye, pesa biso, mpokwa moko na moko, makambo oyo ebómbámá na Liloba na Yo, mpo tókóma Baklisto ya malamute koleka mpe tóbika kokokana na eleko oyo tozali kobika kati na yango, lokola ndakisa ya Boklisto. Tosengi yango na Nkombo na Nkolo Yesu. Amen.

<sup>42</sup> Sikawa, mingi kati na bino, ná ba-Biblia na bino, nalingi ete bózua Buku ya Yona. Ezali . . . Tolobaka ntango nyonso makambo ebele mpenza, na ntina na Yona, ete azalaki mozongi-nsima mpe nyonso wana. Ngai nazuaka ntango nyonso ngámbo ya Yona. Nandimaka te ete Yona azalaki mozongi-nsima. Na—nandimaka yango te. Nandimaka ete ezali kaka . . . Mbala mosusu tosalelaka yango, tolobaka: “Azali Yona.” Kasi soki to . . . Nasílá kolobela yango, na lolenge mosusu, nalobaka ndenge nakanisaka na ntina na Yona, likambo oyo esalemaki.

*Liloba na Yawe eyelaki Yona mwana na Amitai ete:*

*Televa, mpe kende na Niniwe, mboka monene wana, mpe gangela yango; mpo ete mabe na bango esili koya kino liboso na ngai.*

*Kasi Yona atelemaki mpo na kokíma epai na Talasisi longwa na liboso na Yawe, mpe akomaki na Yafu; mpe amonaki masua makokenda na Talasisi: bongo afutaki motuya na mobembo, mpe akitaki na kati na yango, ete akenda ná bango elongo kino Talasisi, longwa na liboso na Yawe.*

<sup>43</sup> Ezali nsuka moko ya mawa, boye te? *Moto Oyo Azali Kokíma Longwa Na Bozali Na Nkolo*, yango nde motó ya liteya na ngai.

<sup>44</sup> Sikawa, tolingi liboso kokanisa likambo oyo. Yona azalaki . . . Ntina, ntina mpenza, oyo nandimaka ete asáláki likambo ya monene oyo, ezalaki mpo Yona azalaki Moyuda. Mpe esengamaki na ye ete ákende na engumba moko ya Mabota, mpo na kopamela yango; kokanisáká ete akoyambama te. Mpamba te, bato ya Mabota yango bakomilobela: “Moyuda oyo, likambo na ye nini ná biso?” Kasi, bomoni, likambo mosusu, etalisi biso likambo moko ya nkembo awa, ete Nzambe azali kaka Nzambe ya Bayuda te, kasi Azali mpe Nzambe ya bato na Mabota. Azali Nzambe ya bato nyonso.

<sup>45</sup> Esalemaki ete Aponaki Bayuda. Bayuda babengamaki libota liponami na Nzambe. Baponamaki na ntina moko eyebanaki.

Mpe ntina yango ezalaki, ya kopesa bango mobeko, kasi bango bakokaki kotósa yango te. Mpe Atalisaki, na nzela ya libota yango, ete mobeko ekokaki kotosama te, mpe Ye azalaki Nzambe ya—ya—ya boyengebene. Mpe mobeko ezalaki kosenga boyengebene, kasi ngolu ezalaki kati na mobeko te, mpo na kolongisa moto. Etúmbu moko te efutamaki na nzela ya mobeko, kasi esengelaki na ngolu mpo na kofuta etúmbu yango, to, esika oyo mobeko etiaki biso na nsé na yango.

<sup>46</sup> Mpe Yona awa, lokola moko na basakoli ya mike ya Biblia, abengamaki mpo na kokende na engumba oyo.

Mpe awa, tomoni ndakisa moko ya biso nyonso. Moto nyonso kati na biso, tokimaka ntango nyonso eloko moko, tokimaka bampasi, tokimaka mikumba, biso—bisó nyonso tozalaka na mposa ya kosala bongo. To—tozalaka—tozalaka na mposa ya kokíma, na esika ya kotelema mpe kotala likambo yango na miso. Bomoni, biso to—to—tokomaka na esika oyo tobandi kokíma.

Mbala mosusu tomikomisa na esika oyo tokomi na mposa ya kokíma mosala. Toboyi na biso, toboyi na biso kosala mosala. Bato mosusu bakanisaka ete bakoki kobika bomoi na bango kozanga kosala mosala. Kasi, nakanisi, ezalaki Salomo moto alobaki ete tokoki kozua eyano, na kotaláká nselele.

<sup>47</sup> Boyebi, mwa nselele, bayebisaka ngai ete soko nselele yango (moko na moko) esali mosala te mpo na kobomba biloko, nselele wana ekolia mpe te na eleko ya malili wana. Boye, moto nyonso asengeli ko—kosala mosala.

<sup>48</sup> Tozalaka na makambo mingi mpenza oyo tosengeli kosala, mikumba mingi mpenza oyo tosengeli kobunda na yango. Moto nyonso asengeli kobunda na mokumba moko boye.

<sup>49</sup> Ntango o—ntango okomi na—na likambo ya kopona mwasi na yo, mpo na kobala, to kopona mobali na yo, o—osengeli komema mokumba. Na bongo osengeli komikanisela. . . Ntango mosusu ozali kotonga ndako; ezali ndako moko ya kitoko mpenza. Na bongo, míkanisela, lokola mwasi abalami, osengeli kokanisa na mokumba ya kobókola bana. Mpe osengeli kokanisa ete bitutu kitoko wana, ya sembe-sembe, ekobeba mobimba na bilembo ya mwa maboko ya bosoto. Na bongo ozali na mokumba ya kotangisa bana na yo. Ozali na mokumba ya kolatisa mpe koleisa bango.

<sup>50</sup> Makambo nyonso ezali mokumba. Mpe ezalaka mpenza pete, ntango mikumba etélemaka liboso na biso, kokíma yango. Mpe tomoni ete libala ezali mokumba, na ndenge nyonso.

<sup>51</sup> Ata, mbala mingi, tomonaka. . . Ezali mpasi mpo na koloba yango, kasi ezali ya solo, ete batei, mbala mingi, bakimaka mokumba ya kozua ngámbo ya Liloba ya solo ya Nzambe, ntango bakútanaka ná Yango. Bakímaka mokumba yango. Ntango Solo ya Liloba na Nzambe etélemaka liboso na biso bato, tozalaka

na . . . tokómaka na mposa ya kozonga nsima kino na nsuka mpenza.

<sup>52</sup> Nauti kosolola na mwana-mobali ya ndeko na ngai kuna. Azali Mokatoliko, mpe a . . . Mpe nabatisaki mwana yango, na Nkombo na Yesu Klisto, awa, eleki mwa mibu, mpe akomaki kobima ná mwana-mwasi moko mpe akómaki Mokatoliko. Mpe nasimbaki loboko ya mama na ye ntango azalaki kobunda na liwa kuna. Mama na ye alobaki na ngai, maloba ya nsuka: “Batela Melvin.” Ye auti kolota ba-ndoto. Azokoka te . . . Mikolo nyonso, nyonso, na mpóso eleki, azalaki kolota ba-ndoto. Alobaki: “Nazalaki kokóta na losambo na yo, Nóko Bill, mpe otelemaki wana, ozoteya. Nayaki na lombangu, mpo na koyambola. Nalamukaki.” Alobaki: “Na—nazalaki na libunga.”

Nalobaki: “Melvin, ozali na ntina ya ndimbola te mpo na yango. Esika na yo ezali kuna, nde esika na yo.” Ya solo. Bomoni?

<sup>53</sup> Kasi mpo na kondima mikumba, mbala mosusu elongolaka biso mpenza loposo, mpo na kosala yango. Lokola tata, osengeli kondima mokumba, ya kobéta mwana na yo fimbo. Bana mike wana, bolingaka kosala yango te. Kasi lokola tata to mama, osengeli kondima mokumba ya kobókola mwana yango, mpamba te Biblia elobi: “Bómba fimbo, mpe okobebisa mwana na yo.” Wana ezali na motuya kino lelo, na miso ya móganga-ya-bizaleli nyonso oyo azali na mokili. Etikali naino Sólo ya Nzambe. Soko bato mingi bazalaki kosalela yango, tolingaki kozala na mobulu ya bilenge ná makambo wana mingi boye te, ná bopoli oyo tozali na yango na mokili lelo. Kasi mobeko ya kala, ya motuya monene ya libota, basili kobuka yango, kala, mpe batíká bana básála nyonso oyo bango balingi.

<sup>54</sup> Kasi ndenge nalobaki, batei, bakokutana ná Solo miso na miso, na nsima bapesaka Yango mokongo. Bomoni, bazalaka—bazalaka kaka na . . . Emonanaka lokola eloko moko ezali, oyo ba—balingaka kokutana na yango te.

<sup>55</sup> Mbala mingi nayambaka bato oyo bayaka, balobaka: “Nayebi ete ezali ya solo, Ndeko Branham, kasi soki nasali bongo, bakobengana ngai na lingomba.” Ekosala nini? Soki osali bongo te, bakobengana yo, kuna na Likoló. Boye, basengeli kobengana yo, esika moko, bomoni. Boye, ekozala malamumu ete okutana na yango, na esika ya kokíma yango mpe koloba: “Ee, nakokende na ngai *awa*. Nakozonga kuna te.” Zóngá, ya solo mpenza, yóka Yango lisusu.

Lukaluka kati na Makomi. Yesu alobaki: “Bólukaluka na kati ya Makomi, mpo na kati na Yango bobánzaka ete bokozua Bomoi na Seko, mpe Yango nde Etátolaka na ntina na Ngai.” Kasi tomoni ete bato balingaka kokutana na yango te.

<sup>56</sup> Komemama, Liboso na Nzambe, mpe komona ntango Nzambe apesaki elaka, mpe Nzambe asengisami na elaka wana. Mpe ntango Akokisaka elaka yango, bato bakómaka kobanga

komema mokumba ya kokutana ná Nsango ya eleko yango. Tomonaka yango bisika nyonso.

57 Bongo bino ba-Lutherien? Ba-Lutherien boni babángaki, bato boni babángaki kokutana ná Solo ya Luther ntango ayaki ná kolóngisama? Bótala oyo eséngaki bino, ntango mosusu bomoi na bino mpenza, mpo na kobima, koyambola Yesu Klisto mpe—mpe kokóma lu—Lutherien.

58 Bótala, bino ba-Methodisiti, ndenge ezaláká, bazalaki kobenga bino nyonso batúntuki. Nabanzi ete boyebaki yango. Bakotaki na Molimo, mpe bazalaki kosutuka-sutuka. Mpe bato balobaki ete ba—bazalaki na “kosutuka-sutuka.” Ba-Meto- . . . Wana, te, oyo wana ezali ba-Pentekoste te; oyo wana ezalaki ba-Methodiste, mibu ebele koleka. Mpe bazalaki kosutukasutuka, mpe koningana, mpe kokwea na nsé na nguya na Nzambe. Mpe bazalaki kobwakela bango mai na elongi, mpe kopepa bango na bipupoleli, bakanisaki ete basézwaki. Mpe, sikawa, bazalaki komona bino lokola lisangá ya batúntuki. Kasi bozalaki, bamama ná batata na bino, basengelaki tó koyamba Yango, kokutana na Solo ná makambo yango mpenza, tó koboya yango.

59 Bongo bino ba-Pentekotiste, oyo boyambaki kozóngisama ya makabo, ntango libatizi ya Molimo Mosantu ebimaki, ná minoko ya sika, mpe makabo ya Molimo ebandaki kozonga na lingomba? Na bongo, ba-Methodiste balingaki kobengana bino, mpe basalaki yango mpenza. Kasi bosengelaki kokutana ná likambo yango. Ezali eloko oyo bosengelaki kosala.

Bongo mpo na likambo oyo, ntango ekomaki, likambo ya libatizi na Nkombo na Yesu Klisto, mpe bomonaki ete ezali Solo? Bosengeli kokutana na yango, to kosala eloko moko na ntina na yango.

Bozali na mokumba, moto nyonso azali na yango, mpe bosengeli kokutana na makambo oyo. Malamu.

60 Na bongo, ntango bomoni, na mokolo ya lelo sikoyo, ntango Liloba na Nzambe elakaki makambo oyo tozali komona kokokisama sikawa, na bongo, tozali na mokumba, to ya kokutana na Yango, to kokende mosika na Yango. Ozali na . . . Okoki kozanga kopona te. Osengeli kosala likambo moko na ntina na Yango. Tóloba . . . Likambo moko esengeli kosalema.

Okoki kokóta na ekuke ya losambo wana te mpe kobima moto moko ndenge okótaki. To okendeke mosika koleka, to pene na Nzambe koleka, mbala nyonso oyo okótaka to obimaka kuna.

61 Oh, ezalaka mpenza pete, mpo bato bákima makambo oyo! Mpe nalingi ete tókanisa na ntina na makambo oyo, ntango tokobanda mayangani mpenza lobi na mpokwa, mpo, nalingi bómona ete, ntango tokutani na likambo moko, soki bo . . . soko motuna moko ezali na ntina na yango. Soki motuna moko ezali na ntina na yango, eyano moko esengeli kozala.

<sup>62</sup> Ndakisa, soki nalobaki ete nazali kokende na westi, mpe olakisi ngai ngámbo *oyo*. Boye, eloko ya liboso, nakoleka mpenza mosika na esika yango, mpe nakozala mpenza. . . nazali na nordi-westi. Boye, bongo soki moto atalisi ngai ngámbo *oyo*, mpe ngai nakei na ngámbo *oyo* kuna? Nakoleka lisusu mosika na esika yango; nakei na sudi-westi. Boye, na ntango nyonso *oyo* motuna moko ezali, ezali ngambo nini ezali westi, eyano moko ya sémba esengeli kozala esika moko.

Mpe ntango tokutani na mituna *oyo*, na ntina na ba-Solo ya Biblia, eyano ya solo-solo esengeli kozala esika moko. Ya solo. Esengeli kozala wana.

<sup>63</sup> Mpe ntango tomoni Eloko moko kotalisama, nakanisi, na esika ya kokima, koloba: “Ah, boléma! Nakoki kondima eloko ya ndenge Wana te. Nakoki kondima Yango te,” mpo na nini te kozua Biblia, kofanda mpe kokutana na likambo Yango? Yekola Yango. Bozali awa na liyangani sikawa, bótala-tala Yango malamumu. Bótala Yango malamumu, bino moko, elongo ná Liloba. Bótala Liloba malamumu, na nzela ya Liloba. Yango nde nzela kaka moko mpo na kosala ete Éloba Solo. Mpe Esengeli koloba Solo, kobanda na Genese kino na Emoniseli.

<sup>64</sup> Klisto azali emoniseli ya Biblia mobimba. Kati na Ye, Klisto, litondi mobimba. Kokokisama ya masakoli nyonso ya Biblia ezali kosalema, kozanga mobeko, na kati na Klisto Yesu, mpo Azalaki Nzambe *oyo* atalisami kati na nzoto.

<sup>65</sup> Sikawa, ntango tozali komona makambo *oyo*, ata bongo, ntango tozali kokutana na yango mpe toyeyi na liyangani, mpe tomoni Nguya na Nzambe kosala mpe kokokisa makambo, mpe kosala misala ya kokamwa, mpe tomoni yango kokokisama, mpe totali na Biblia mpe tomoni ete elakamaki mpo na eleko *oyo*; na bongo, ntango tomoni makambo yango, na bongo, tokutanaka na mokumba, tó ya koyamba yango, nalingi koloba, mpo na biso moko.

<sup>66</sup> Sikawa, bato mingi basepelaka na yango, bato mingi balobaka ete ezali ya solo. Kasi yango ezosala te—yango ezosala te ete ézala *oyo*. . . Yango nde eloko *oyo* ozali na mokumba na yango te. Ndenge nauti koloba, bongo soki. . .

<sup>67</sup> Soki nazalaki elenge mobali, mpe nazalaki koluka mwasi, ya kobala; mpe namoni elenge mwasi *oyo* akokisi eséngisi nyonso *oyo* ngai namonaki ete esengeli mpo na kozala mwasi. Ee, na bomoto, azali mwasi-mokonzi, kitoko, mpe—mpe azali na ezaleli ya malamumu, Moklisto ya solosolo, nyonso *oyo* nakokaki kokanisa, mpo na kozua mwasi malamumu. Ata nalobi ndenge nini ete abongi be, ete azali mpenza mwasi *oyo* asengeli, akozala ya ngai te kino nakondima ye mpe nakozua mokumba na ye lokola mwasi na ngai.

<sup>68</sup> Nde ndenge moko mpe Nsango *oyo* ezali. Okoki koloba: “Ezali ya solo, to *oyo*, *oyo wana*, to *oyo kuna*.” Mpe koloba:

“Nasepelaka ná Yango, nandimaka ete Ezali Solo.” Kasi osengeli koyamba Yango; mpe Esengeli kokóma eteni na yo, mpe yo eteni na Yango. Osengeli . . . Na bongo, Ekomi ya yo.

<sup>69</sup> Ntango obali mwasi oyo yo osilaki kopona, bokomi—bokomi moko na ntango wana.

Mpe lolenge wana nde ozali ná Klisto. Ntango omoni Ye kotalisama polele mpe komonisama solo, na ntango wana nde okomi eteni na Ye, mpe Ye akomi eteni na yo. Mpe, elongo, bokómi eteni ya Nsango.

<sup>70</sup> Oh, masuwa boni ya ba-denomination tozali na yango oyo ezokende na Talasisi, mpo na ba-Yona ya mikolo oyo, masuwa nkama libwa, koleka, ezali kolanda nzela wana ya petee. Balingi kokutana ná yango te.

Yona alingaki kokutana na likambo ya kokende epai ya Mabota. Alingaki komema Nsango ya kanza wana kuna te: “Na mikolo ntuku minei, bokokufa soki bobongoli mitema te.” Ayinaki kosala likambo yango. Mpe amilobelaki: “Bato ya Mabota wana, ezali mpasi mpo na koyeba eloko nini bakosala ngai.” Kasi asengelaki kokutana na likambo yango. Bomoni? Kasi azuaki masuwa ya bopete mpe akendeke na Talasisi, akitaki na nsé, na kati ya masuwa yango mpe alalaki; alandaki nzela ya petee.

<sup>71</sup> Ezali nzela ya petee, ezali nzela ya lokumu ná bato. Ezali petee mpo na kolanda nzela oyo bato nyonso bakoki kosimba yo na mokongo mpe koloba ete ozali moto malamú: “Oyo nde *Songolo-Pakala* mpe *Fulani*,” mpe mokili ekotómbola yo. Ezali pete mpo na kolanda nzela ya bato nyonso.

Kasi ntango—ntango osengeli kosala likambo ya ndenge mosusu, ntango osengeli kozua ngámbo ya kondima na yo mpenza, na oyo oyebi ete ezali Solo, yango nde eteni ya mpasi, wana nde mindondo eyaka, wana mpenza.

<sup>72</sup> Oh, ndenge toyémbaka mbala mingi loyembo ya kala wana:

Ezalaka pete konana na mbu oyo efandi kimia,  
Kotalela bokasi ya loboko monene ya Jehovah.

Kasi, oh, tika mbóngé ébanda kobeta, tika—tika mopepe épépa mpe étombola mbonge, na ntango wana, okosala nini?

<sup>73</sup> Lokola likambo moko, oyo bayebisaki ngai na ntango moko, oyo mwasi moko alobaki. Kalakala, na ntango ya mituka ya mpunda, alobaki ete mpunda epakataki mbangu ná ye, wana autaki na losambo. Balobaki: “Osalaki nini?”

<sup>74</sup> Alobaki: “Natiaki motema na Nkolo kino basinga ya mpunda ekatanaki.” Boye, wana nde ntango ya kotia motema na Nkolo, nsima na makambo nyonso . . . nsima na basinga kokátana. Okotia motema na basinga, kino ntango ékatana. Iyo.

<sup>75</sup> Na bongu, tomoni ete tozalaka na banzela mingi ya petee, ya kolanda, ba-masuwa oyo ekendeke na Talasisi, mpo ezali petee, kozánga komema mikumba. Etiolaka, makambo nyonso ezali koya; bato nyonso bazali kosepela na yo. Mpe, bato nyonso, ozali. . .Moto moko te azali kotelemela yo; yo mpe otelemeli moto moko te. Sikoyo, oyo wana ezali kikolopo mpenza! Ya solo. Iyo, azángá kiló, bindimá-ndima! Malamu, moto nyonso, ózala nani, mpe ózala na ngámbo nini. . .Na bosolo mpenza, bato oyo bakanisaka malamu mpenza bakosepela na yo koleka, soko otelemi ngwi na makambo oyo ondimaka mpenza ete ezali sémbu. Ya solo. Etali te. . .

<sup>76</sup> Ndakisa, ozui mwasi moko, akoki na ye kozala kitoko mingi mpenza te, mpe kozala ata ndenge nini; kasi tika mwasi yango átosa bizaleli ya bomwasi, átelema ngwi lokola mwasi mpenza; mpe soki mobali moko azali na mwa ndambo ya kimobali kati na ye, akozua ngámbo ya mwasi yango. Na ntembe te. Bato basepelaka na eloko oyo—oyo moto moko azali na yango, oyo bandimaka ete ezali solo mpe bazuaka ngámbo na oyo bamonaka ete ezali malamumu.

<sup>77</sup> Balembá-lembá mpenza, wana nde ndenge Baklisto mingi bakómi lelo, basili kolemba mpenza ná nyonso wana, kino bakanisaka ete nyonso basengeli kosala ezali kaka kokóta na lingomba, kokóta esika moko, kotia nkombo na bango na buku, to kosala mwa eloko moko, kopumbwa-pumbwa, kogánga, to—to eloko moko ya ndenge wana, mpe bazobénga yango Boklisto.

Boklisto ezali bomoi ya mokolo na mokolo, ya bomoi ya etumba, kobika mpo na Nzambe kati na. . .na mokili ya lelo oyo. Ezali likambo ya kozala na Móto ná bolingo na Nzambe kopela na motema, ntango nyonso, yango ekopesa yo móto mpe ekobimisa yo libanda, kozala ná bato, mpo bábóngwana epai na Klisto. Mikumba.

<sup>78</sup> Kasi ezali petee mpo na kolanda ndenge mokili ezali kokende. Ezali petee kotiólá elongo ná mokele-na-mai.

Kende kofanda kuna na ebale, ná bwáto na yo. Yo zua nkáyi mpe banda kolúka nkayi na esóngó na mai oyo ezali kotiola; okokende mbangu mingi te, mpe ekozala mpasi. Kasi tika kaka kolúka nkayi mpe okomona ndenge okoleka banzete mbangu-mbangu, okozala kokita, kasi tala epai ezali kokende!

Ntango makambo ezali kotepa-tepa na petee, kobosana te ete ozali kokende na ngambo na—na bwéta kuna na nsé, ya lolenge moko boye. Ozali kokende na bweta, mpe kala mingi te okokwea na bweta yango. Kotepa-tepa elongo ná mokili, na pete nyonso, lolenge na yango, okolinga likambo wana te. Te, mesié. Kasi osengeli ko- . . . kondima mokumba na yo.

<sup>79</sup> Sikawa, bondimi Yango, mpe bozali na- . . .Bokanisi ete Ezali Solo.



<sup>80</sup> Mpe mokumba oyo Nzambe apesi biso lelo oyo, ezali ya komema Nsango oyo! Mpe, wana nabandi kokoma mobange, mpe nayebi mikolo na ngai kokita, nazoyoka mokumba kokoma monene koleka ndenge natikálá koyoka. Kokóba kokende liboso, tosengeli kosala yango! Tosengeli komipesa na likambo yango, na bisika nyonso tokendeke, mpe kosakola Nsango; mpe—mpe koyebisa bato ete Yesu Klisto azali koya, ete Azali Nzambe mpe Azali koya noki. Elikia moko te—moke te etikali na mokili, bobele Boyei na Nkolo.

<sup>81</sup> Ntango nabwaki miso kuna, namoni baninga mosusu oyo bazalaki elongo ná ngai kuna, ntango Mwanje na Nkolo... Bandeko mibali oyo bafandi awa, nabanzi ete bamonaki esika oyo yango esalemaki, kuna na likoló. Mpe bómikanisela eloko oyo Nkolo alobaki mokolo wana, mpo na Ndeko Wood. Azalaki komata ngomba. Mpe—mpe azalaki kolela mwa moke, mpo mwasi na ye azalaki kobela. Mpe Nkolo alobaki: “Lokóta libanga wana mpe bwaka yango na likoló, mpe lobá: ‘YANGO ELOBI NKOLO.’” Nasalaki yango. Ndeko Wood afandi awa lokola nzeneneke.

<sup>82</sup> Mpe nalobaki: “Ndeko Wood, ekoumela mingi te, okomona likambo moko kosalema.” Mpe na mokolo oyo elandaki, ntango totelemaki wana, biso nyonso elongo... Mpe mingi kati na bango bazali awa na mpokwa oyo.

<sup>83</sup> Elenge motei moko azalaki wana, azalaki... Namonaki... Nakútanaki na ye kaka na mpokwa oyo eleki. Azalaki na kati ya moláko na biso. Ayaki mpo na kozala elongo na biso. Alobaki na ngai, alobaki: “Ndeko Branham, esálemaka ete ómona bimononeli, libanda, lokola boye?”

<sup>84</sup> Nalobaki: “Iyo, mobali. Kasi nayáka awa mpo na kozala mosika na yango, mpo na kopema mwa moke.” Alobaki... “Malamu,” nalobaki, “na—na... Ya solo, Alakisaka ngai makambo awa.” Mpe nalobaki: “Kaka na ngámbo mosusu ya ngomba awa, nde esika Banje nsambo bamonanaki, *kuna*.”

Alobaki: “Iyo, nasosoli.” Alobaki: “Nazalaki moko na bapési-mbongo na mayangani na yo kuna na California.”

Nalobaki: “Malamu, nasepeli mpenza koyeba yango.”

<sup>85</sup> Mpe, ntango nazalaki wana, natambwisaki miso mpe namonaki monganga moko ya monene, azalaki kotala miso na ye, mpe nayokaki ye koloba: “Liso yango ekokufa, mpo ezali na mpasi na kati kuna. Nasalisi yango mibu mibale, kasi okobungisa liso wana.”

Nalobaki: “Ntina oyo otuni ngai bongo, ezali mpo monganga na yo ayebisaki yo, mokolo wana, okobungisa liso wana.”

Mpe alobaki: “Ya solo,” mpe atambwisaki miso *boye*.

<sup>86</sup> Mpe namonaki mama na ye kolongola moko na basoséti na ye, mpe alakisaki lokolo na ye, ezalaki na ba-tumeur mike-mike

kodiémbela katikati na misapi na ye ya lokolo, mpe alobaki: “Soko omoni Ndeko Branham, yebisa ye ete ábondela mpo na oyo.”

Nalobaki: “Mama na yo asembolaki . . . abimisasi lokolo *boye*, mpe alobaki ete azalaki na . . . azali na ba-tumeur mike-mike na misapi na ye—na ye nyonso ya makolo, ndenge wana, mpe alobaki: ‘Senga Ndeko Branham ábondela.’”

Alobaki: “Ndeko Branham, ezali solo.”

<sup>87</sup> Natalaki na nsima. Ntango nasalaki bongo, namonaki ye atelezi wana, azali kotala ngai, *boye*, ná miso na ye ya mpembe pempeni. Nakutanaki na ye na eleko ya ebandeli ya mpio oyo; azalaki na miso malam koleka bato nyonso na moláko. Nkolo abikisaki ye mpe apesaki ye bokolongono.

<sup>88</sup> Ntango natelemaki wana, Nkolo alobaki, alakisaki ngai likambo oyo elingaki kosalema. “Kosambisama elingi kobeta Libongo ya Westi.” Mpe Alobaki: “Kende kuna, pembeni na esika ya móto wana.”

<sup>89</sup> Nasimbaki páwu na loboko; natámbolaki kino na esika yango. Mpe Ndeko Roy Roberson, biso nyonso awa toyebi ye. Azali awa te, na mpokwa oyo, na boyebi na ngai; azali kuna na Arizona. Azali motó ya bayangeli-misolo awa, mpe nayebaki ete azali ancien combattant. Mpe likambo moko elingaki kosalema; ezalaki ntongo moko kitoko mpe kimia mpenza, pene na ngonga ya zomi na ntongo. Bandeko nyonso bazalaki zinga-zinga wana, tozalaki zomi to zomi na mibale, tozalaki kokitisa ba-hema, kolongola loposo ya bangulu ya zamba, mpe nyonso wana. Boye, biso . . . Natambolaki mwa moke, nalobaki: “Roy, míbomba, noki-noki. Likambo moko elingi kosalema.” Nakokaki koyebisa ye makambo mosusu te. Kasi kaka ntango nakomaki na ngambo wana . . .

Mpe, uta na likoló, ekumbaki ya Nzambe ekitaki, mpe etindikaki lokito, tóloba, eningisaki ba-ngomba, ekitaki kati na ngomba wana, etimolaki libulu moko zinga-zinga na yango, ya ba-metre moko na ndambo likoló ya motó na ngai, mpe ekátaki ba-sóngé nyonso ya banzete wana, wana mabanga ezalaki kopimbwapiimbwa. Emataki na likoló mpe ekitaki lisusu na nse, ná libatizi mosusu ya monene, mpe ebetaki ngomba mobimba, mpe ebwakaki mabanga bisika nyonso, ndenge wana. Esalaki bongo mbala misato, nsima na yango, emataki na likoló.

Mpe Ndeko Banks ayaki epai na ngai, alobaki: “Yango nde likambo olobaki lobi?”

Nalobaki: “Iyo, misie, ezali mpenza yango.” Bomoni?

<sup>90</sup> Bongo, mikolo mibale nsima na yango, Alaska etikalaki moke, ézinda mpenza, kuna. Mpe kokita mpe komata na Libongo ya Westi wana, ba-nkake ná kotindikama, mpe nyonso wana

ezali kosalema. Mpe moko na mikolo oyo, ekoselimwa na nsé ya mbu. Ya solo. Ezali nini? Tozobika na ngonga ya Boyei na Nkolo.

<sup>91</sup> Tozali komona ba-isme ná makambo mosusu kotelema, mpe biloko mosusu nyonso wana, Toyebi ete eyano moko ya solo esengeli kozala mpo na likambo oyo.

Bato bazali awa, na ekólo sikawa, oyo bazokota na kati ya mabulu mpe nyonso wana: “Mpe mokolo mwa 16 na sanza ya Misato,” botangaki yango na zulunale, “Nkolo azali koya.” Toyebi ete ezali bongo te.

Yesu alobaki: “Moto moko te ayebi miniti to ngonga yango.”

<sup>92</sup> Ntango tozali komona makambo nyonso oyo, mpe makambo oyo ezali kosalema ndenge ezali kosalema, eyano moko ya solo esengeli kozala esika moko. Solo moko esengeli kozala. Esti ezalaka moko; mpe westi ezalaka moko; kasi sudi-esti moko ezali, mpe nordi-westi, to eloko moko boye. Kasi eyano moko ya solo esengeli kozala, esika moko, mpo na likambo yango. [Maloba mazangi na eteni oyo ya bande—Mok.]

<sup>93</sup> Kokíma yango? Tosengeli koyebisa bato ete tozali kobika na ba-ngonga ya Boyei ya Mwana na Nzambe. Tolingi—tolingi kosenzela mpe (Nzambe) kokoba kotambola, ntango nyonso, kobelema mpo na kopesa moto eyano oyo elongobani.

<sup>94</sup> Ezalaka ntango nyonso bongo. Ezalá—ezalá na kati ya moto likambo oyo ya kokima mpe kokende mosika na Nzambe, banda na Adama, na elanga ya Edene. Ntango Adama azalaki na elanga ya Edene, ntango akutanaki na mokumba ya kopona, akotikala ná Nzambe to akokende ná mwasi na ye? asengelaki komema mokum-. . . asengelaki kosala yango, mo—mokumba yango ezalaki likoló na ye. Asengelaki, tó kokamata oyo mwasi na ye alobaki, tó oyo Nzambe alobaki. Ntango aponaki kolanda nzela oyo ya mwasi na ye, ntango asalaki bongo, na ntango wana, abungisaki lolenge na ye ya ebandeli. Mpe amemaki mokili mobimba na kufa, ntango asengelaki komema mokumba yango, to koyamba pole ya sika, oyo mwasi na ye autaki kozua, oyo ekesanaki.

E Nzambe! Bókanisa naino. Nzambe apesaki bango kaka Maloba soko mwambe to zomi ya kotosa. “Kasi mbuma ya nzete wana, bokolia yango te.” Yango nde nyonso oyo basengelaki kotosa. Kasi ata na mwa Maloba moke wana, babukaki Yango.

Na bongo, Adama asengelaki kokutana na likambo: “Ná—násala ndenge mwasi na ngai alobi násala, to násala oyo Nzambe alobi násala?” Mpe akendeki ná miso polele. Asengelaki komema mokumba yango. Ebwakaki libota mobimba ya bato na kufa.

<sup>95</sup> Na nsima, Adama mosusu ayaki, oyo azalaki Klisto, ata moko te lokola Ye! Moto moko áloba ete Azalaki Nzambe te? Ezaleli na Ye moko mpenza etalisaki polele ete Azalaki Nzambe. Ekelamu moko te atikalá kobika lokola Ye. Azalaki kobika

na mokili na Ye moko. Abótamaki libanda na mosánda ya moto ya mokili, ya masumu. Aleluya! Azalaki Mokeli Ye moko akómi nzoto.

Nani akokaki mpenza kotelema esika oyo Ye atelemaki? Nani atikálá koloba lokola Ye? Nani akokaki koloba makambo oyo Ye alobaki? Nani akokaki mpenza kosala makambo oyo Ye asalaki? Bokeseni ya ezaleli na Ye mpenza etalisaki polele ete Azali Nzambe. Ata mosakoli moko te, to moto mosusu te, akokaki kosala makambo oyo Ye asalaki; Nani akokaki kobenga bakufi longwa na nkunda, mpe Nani akokaki kotelemisa likoló, mpe kosala nyonso oyo Alingaki kosala. Azalaki Nzambe. Nani akokaki mpenza kotelema na esika na Ye? Nani? Akokaki kozala eloko mosusu te bobele Nzambe abongi be, azangá kufa, aláti nzoto mpe afandaki katikati na biso!

<sup>96</sup> Eloko moko te etikálá kokokana ná Ye. Azalaki kobika na mokili oyo ya Ye moko. Moto moko te atikálá koloba lokola Ye. Ntango kaka Azalaki kofungola monoko, ezalaki na eloko moko, oyo ekesanaki na bato mosusu nyonso. Moto moko alobaki ete Azalaki moto lokola bato nyonso; natelemeli yango. Azalaki Nzambe. Yango nde oyo Ye azalaki. Mpamba te, moto moko te atikálá koloba lokola Ye, moto moko te akokaki koloba lokola Ye, mpo Azalaki Liloba na bomoi Yango moko eláti nzoto, kotalisama ya litondi ya Nzambe.

<sup>97</sup> Nandimaka yango, basakoli wana bazalaki na nsango na bango. Bazalaki na yango na ntango wana; bazali na yango sikawa. Kasi litondi ya Bonzambe kati na nzoto, emonisamaki wana. Azalaki na lolenge na Ye moko, mpe Azalaki Ye oyo asengelaki kobunda na likambo yango. Ná nguya na Ye nyonso oyo Azalaki na yango, Akokaki mpenza kokoma mokonzi ya mokili mobimba. Akokoma yango; mpe Ye, mpo na basantu na Ye, Azali bongo sikawa.

<sup>98</sup> Atelemaki wana. Moto nini oyo azalaki mobóla, azangaki esika ya kotia motó; nzokande ayebaki esika nini mbisi oyo emelaki mbongo ya libende ezalaki? Nani, moto nini oyo akokaki kozua ba-mbeki minene ya mai wana mpe kobongola yango na vinyo, bongo Ázala na esika ya kotia motó te? Asengelaki kondima mikumba oyo epesamelaki Ye. Moto nini oyo akokaki kobimisa moto na nkunda, nsima na ye kokufa mikolo minei mpe kopola?

Akokaki komibikisa Ye moko te? Ya solo mpenza, Akokaki kosala yango; kasi soko Ásalaka yango, mbele Alingaki kobikisa biso te. Asengelaki kondima mikumba, mpo na botosi na Ye na Liloba! Esika oyo, na kozánga botosi ya Adama, mpe akamataki nzela ya mokuse, nze—nzela ya kokita na Talasisi. Kasi Yesu akamaki nzela ya Niniwe, epai na Mabota, mpo na komizuela Ye moko Mwasi na libala. Nazali na esengo, na mpokwa oyo, ete

Asalaki yango. Tosengelaki kondima mpenza makambo oyo, ete tozali wa Ye, mpe koboya mokili. Amen!

<sup>99</sup> Moto nyonso asengelaki kondima likambo yango, oyo azali na mokumba liboso na Nzambe. Tózua, ndakisa, Noa. Azalaki na yango. Noa, Mose, Eliya, ná bamosusu nyonso na—na bileko nyonso, basengelaki kondima komema mokumba. Basengelaki kosala yango, kasi yango nde ntina oyo batindamaki moko na moko na eleko na ye.

<sup>100</sup> Bótala Noa, na eleko na ye ya zebi, ndenge nini asengelaki kondima eloko oyo ezalaki ya zébi te. Na bongo, ntina a—a—ata moko te ezalaki mpo ézanga kokesene na zébi. . . Bomoni, e—etelemelaki zebi, naloba bongo. Ee, balobaki ete mbula ekonoka uta na likoló. Batikálá mokolo moko te kozua mbula konoka uta na likoló. Sikawa, asengelaki kondima likambo yango. Nzambe alobaki ete mbula ekonoka. Na bongo, ye. . .

<sup>101</sup> Na bongo, kondima zángá misala esili kokufa, soki olobi: “Nandimi yango,” kasi osali eloko te. Ezali kaka lokola Nsango, soki olobi: “Nandimi yango,” mpe osali eloko moko te, ekosunga yo na nini? Bomoni? Noa abandaki kosala mosala ná nzondó na ye mpe atongaki masuwa, mpo na kondimisa likambo oyo azalaki kolobela. Yango nde biso mpe tosengeli kosala. Tosengeli kobanda mosala, mpe kotalisa kondima na biso polele, na nzela na misala na biso. Misala na biso nde etalisaka kondima na biso.

<sup>102</sup> Mose asengelaki kosala yango, mpe Eliya asengelaki kosala yango. Mosakoli nyonso, na eleko na ye, asengelaki kotelema mpe komema mikumba yango. Kasi mingi kati na bango basálaki lokola Yona te. Ye akimaki; bango bakimaki te.

<sup>103</sup> Bótala: “Gángela yango.” Oh, la la! Yango mpenza. Yango nde motó ya liteya: “Gángela yango.” Wana nde likambo ya kosala.

Kende kuna mpe yebisa bato yango: “Tálá, nayei kokóma moko na bino, baninga. Boyebi, nabanzi ete nakoyebisa bino eloko nini nakosala. Nazali na mwa eloko moko awa, nakanisi ete nakoki kokomisa yango. . . kosangisa biso nyonso elongo, mpo na kosala likambo *oyo, oyo wana to oyo mosusu.*”

Kasi, ezalaki: “Gángela yango,” ntango osengeli kogángela likambo moko. Sikawa, asengelaki kogángela nyonso oyo ezalaki kuna; kogángela engumba, kogángela mosala na bango, kogángela lingomba na bango, kogángela basakoli na bango, kogángela batei na bango, kogángela banganganzambe na bango. “Gángela yango, likambo yango mobimba! Gángela yango!”

<sup>104</sup> Noa agángelaki eleko na ye. Ya solo mpenza, asalaki yango, kotelemela mangomba ya eleko na ye.

Mose, na bosolo, agángelaki e—eleko na ye; bato, banganganzambe, mpe bongo na bongo. Agángaki nzela

mobimba kati na lisobe. Na matákanelo nyonso, azalaki kogánga, azalaki ntango nyonso kogánga epai na bato.

Eliya ayebanaki mpenza te na mokolo na ye, mpo azalaki kogángela eleko yango. Ya solo mpenza.

<sup>105</sup> Yoane Mobatisi ayebanaki mpenza te na eleko na ye. Agángelaki eleko na ye. Alobaki na mokonzi, nku—nkumu ya—ya mboka; a—azalaki na, abalaki mwasi ya ndeko na ye. Asengelaki koteya likoló na libala mpe koboma libala, na ntongo moko. Boye, agángelaki yango, alobaki: “Mobeko epesi yo nzela te ya kozua ye.” Esukelaki ye mabe, basengelaki kokata ye motó, nsima na yango, kasi agángaki mpe atelemaki ngwi na esika na ye ya mosala.

Atikálá kozua masuwa ya Talasisi te, mpo na koloba: “Ee, nakoyokana na yo Elode. Ezali na yango mabe te. Na ntango nyonso oyo omoni ete azali mwasi malamumu, ete azali mwasi malamumu mpo na yo, kende liboso.” Oh, mawa, ba-kikolopo wana! Bomoni, iyo, eloko nyonso ya moke, hmm! Ee, ezali na ntina moko te, bobele kopangusa basani ya bosoto ná yango.

<sup>106</sup> Kasi, bótala, Yoane azalaki bongo te. Ye atelemelaki yango mpenza. Alobaki: “Mobeko epesi yo nzela te ya kozua ye.” Iyo, misié. Mpe atelemelaki yango.

<sup>107</sup> Bakímaki ata moke te. Yoane akimaki te. Batelemaki wana mpe batelemelaki makambo yango. Mose amekaki kokíma, mokolo moko, lokola Yona, kasi Nzambe azongisaki ye. Míngi kati na bango bamekaki kokíma yango; balingaki kobanda . . .

Kasi, bótala, soki Nzambe abengi yo, mpe ondimisami ete Nzambe azali kati na Nsango, eloko moko te ekozongisa yo nsima. Ezongisaki Yona nsima te. Te, mesié.

<sup>108</sup> Amosa ya kala, agángaki, alobaki: “Nkosi engulumi, nani akobanga te? Mpe Nzambe alobi, nani akosakola te?” Nani akosakola te, ntango omoni Nzambe alobi, mpe alobaki ete likambo songolo ekosalema, mpe ekokisami?

<sup>109</sup> Nkosi engulumaka, moto nyonso abangaka, iyo, mesié, soki otikálá koyoka nkosi konguluma na zámbe. Bokoki koyoka baoyo balelaka lokola ba-niao, awa, baoyo bato babokolaka na mwa bandako, kasi bosengelaki koyoka oyo ya solosolo, ya zámbe, konguluma mokolo moko. Ekweisaka mabanga ya mikemike na ngomba, na ntáka ya metre pene na nkama mitano. Nalingaka koyeba ndenge nini lokito nyonso wana ebimaka na mapúlúlú wana. Akokitisa motó, aningisi nsuki wana; natikálá koyóka eloko moko te. . . Lokola lo—lokito ya masasi, ntango abimisaka lokito wana uta na mapúlúlú na ye. Nani yango akobanga te?

Balobaka, soki nkosi ebomi yo, okokufa na mpasi te. Okokufa na nsómo liboso ákanga yo. Bomoni, okoyeba yango te.

Akobangisa yo na konguluma makasi ya nyama ya nkanza wana, mpe akokanga yo na mwa seconde moke mpenza.

<sup>110</sup> Alobaki: “Nkosi angulumi, nani akobanga te? Mpe Nzambe alobi, nani akosakola te?” Ntango omoni Nzambe kosala likambo moko, olobi... “Ntango mosusu nazali na ngai mosakoli te...” Yona alobaki... “Ntango mosusu nazali na ngai mosakoli, to mwana ya mosakoli te. Kasi Nzambe alobi, nani akosakola te?”

<sup>111</sup> Ntango mosusu nazali na ngai mosakoli te, ntango mosusu nazali *oyo, oyo wana*, to *oyo mosusu* te. Ntango namoni Nzambe kosala likambo moko, mpe namoni yango awa na Liloba, mpe Alakaki yango, nani akofanda kimia mpe kozánga koloba? Ya solo mpenza, Asili kosala yango.

<sup>112</sup> Tokoki mpe komibomba na nsima ya bindimeli ná makita nyonso wana te, mpe kokita kino na—na Talasisi. Toboyi kotambola elongo ná makita wana.

<sup>113</sup> Kasi bato mingi, lokola Adama, basalaka likambo yango moko, balukaka komisalela eloko mosusu na lolenge moko boye, koluka ekimelo moko boye, mpe—mpe bamisálelaka eloko mosusu, mpo na kokutana na Nzambe. Nsima na bango koyeba ete bazali na libunga, wana bakútani ná Solo, alandaki mwasi na ye mpe asalaki mpenza likambo oyo Nzambe alobaki na ye ete ásála te. Akendeki liboso mpe asalaki yango, ata bongo. Na bongo amimonaki ete azalaki bolumbu, mwasi ná mobali, bango mibale, na elanga ya Edene. Miso na bango efungwamaki. Bayebaki oyo ezalaki malamú ná mabe, na ntango yango. Na nsima, akomaki koluka eloko mosusu, mpo na komizipa na yango.

Sikawa, yango mpenza nde lolenge oyo tozali kosala lelo, komilongisa, koloba: “Ee, nalobi na yo, soki ezalaki *awa*,” to, “soki *oyo*,” to, “*soki, soki, soki*”! Wana ezali kaka... Bomoni? Kasi osengeli kokutana na yango. To ezali malamú, to ezali mabe. Mpe soki ezali malamú, tókangama na yango. Soki ezali mabe, bókabwana na yango. Esili. Bózua oyo... Bóluka koyeba oyo ezali malamú. Bozali na ntina ya kozela ntango molai te. Tóluka sikawa koyeba oyo ezali Solo mpe oyo ezali malamú, mpe tókangama na yango. Toyebi ete ezali solo.

<sup>114</sup> Sikawa, tokomi komona lelo, ete bato na biso bakómi mpenza... Ezali komonana lokola ete bosembo esili kolongwa kati na mangomba. Ngai... Na kati ya...

<sup>115</sup> Tozali kofanda na ndako moko kuna, ya ndeko mwasi moko ya motuya oyo asámbelaka na losambo oyo. Ntango mosusu azali awa na mpokwa oyo. Mpe afutisaka yango na... bato. Mpe azali na boboto mingi epai na biso na ntina na esika yango, ndenge apesaki nzela ete tozua esika yango. Na boye nalingaki kotánga nkombo na ye, kasi ntango mosusu akosepela te ete násala yango. Mpe azali na boboto mingi epai na biso, ee, na ntembe te, toko—

tokolinga kotalisa ye polele te. Kasi azali mpenza, mpenza mwasi ya motuya. Mpe na ndako yango, television moko ezalaki na ngámbo moko. Tozali na mwa ndako moko, mibale ekangámá.

Nazali na libota monene, mpe bana mingi, mpe biso . . . mpe bo—boyebi, mpe basengeli kozala na ba—mbeto, mpe ezali mingi. Mpe biloko ya ndenge na ndenge etondi likoló na yango, osengeli koleka na kati ya *oyo* mpe na kati ya *oyo kuna*, mpo na kokóta mpe kobima.

<sup>116</sup> Na bongo, na ngámbo wana, bazalaki na television. Mpe na television yango, bana bazalaki kotala, mokolo ya Lomongo na ntongo, ba-nzembo moko boye, oyo bazalaki kolakisa. Mpe, boyebi, e—ekokaki koyokisa yo nsoni; soki Boklisto ya solosolo ezalaki te na esika moko, oyo okoki kotia maboko likoló na yango, mpo na komona oyo babengi Boklisto. Boye, ezomonana lokola bosembo esili kobima libanda na yango. Boye, bazali te, ekomi lokola . . . Boye, ekomi mpenza nsómo, ndenge batelemaka wana, bakangaka makófi mpe babundaka bamoko ná bamosusu, kuna, wana bazali koluka koyemba ba-nzembo mpe nyonso wana, ndenge wana; mpe basalaka máseki oyo ata mosali ya masuwa akoki kosala mpenza te, mpe balobaka makambo ya ndenge nyonso, na bana mpe nyonso wana. Boyebi, ezomonana lokola bosantu ya—ya—ya Boklisto ezali lisusu na esika na yango te.

<sup>117</sup> Sikawa, nakokende na losambo mpe—mpe nakomona mokengeli kotelema kuna mpe kopesa liyebisi, ete e—ekozala na mo—momekano moko ya konyanya. Basi nyonso ná bilamba ya kosukola mái, bango nyonso bakokende kuna. Bakosala momekano; basi yango, ya konyanya. Mpe bakozala na li—lipati ya lolenge moko boye, mpe bakokálinga ba—basoso mingi, mpe bakobeta lisano ya lotó, mpe—mpe masano ya ndenge na ndenge. Mpo na ngai, oyo wana elongolaka bosembo ya solosolo na Boklisto; bakosala bisalela ya ndenge nyonso.

<sup>118</sup> Namonaki, ntango nazalaki koya awa, tomonaka . . . Boyebi, tomonaka bandeko na biso ya basi mingi kolata bakupe, awa, na ekólo ya malili oyo, koleka oyo tomonaka kuna, na ekólo ya molunge wana. Bomoni, ezali solo. Kuna, esika molunge ezalaka makasi mpenza, basi oyo balataka yango, bazalaka mingi mpenza te. Kasi awa, esika—esika malili ezali, ba—basalaka yango. Bomoni, ezali, bazoyeba te ete zabololo nde azosala yango. Bomoni? Sikawa, soki ezalaki mpo na komiyoka malamumu, soki ezalaki mpo na komisunga, elingaki kozala ndenge mosusu. Zalá mobali, nakanisi ete epésaka mposa ya kosánza mpo na mobali kolata yango, kasi bo—kasi boko—bakokipe mibali ata moke te. Kasi, mwasi, nzo—nzoto na ye ezali búlee, mpe asengeli kobatela yango ndenge wana. Mpe komona . . .

<sup>119</sup> Bokoki komona, bato lelo. Milimo ezali mibale. Moko na yango ezali Molimo Mosanto; mosusu ezali molimo ya



mbindo, mpe moto akambamaka na yango. Mpe nyonso mibale esámbelaka. Sikawa, iyo, yango nde eloko ekamwisaka, nyonso mibale esambelaka. Ndakisa Esau ná Yakobo, bango mibale bazalaki basámбели; lokola Kaina ná Abele, nyonso mibale basámбели; ndakisa Yuda ná Yesu, bango mibale bazalaki basámбели. Mpe tozali komona yango lelo, ngámbo nyonso mibale, basámбели. Bomoni, ezali kaka molimo yango moko. Bato bakufaka, kasi molimo ekufaka te. Ekobaka, nyonso mibale ezali ya basambeli.

Moko na bango akonzami na Molimo Mosantu, baoyo babikaka bomoi oyo basengeli kobika, mpe batambolaka na bosantu mpe na bosembo. Bakokosa yo ata mpo na centime moko te, mpe ba—bakosala nyonso na bosembo mpenza, mpo na kosunga bato. Kasi baoyo mosusu bako. . . Bazalaka mpenza bato malamú.

Kasi baoyo mosusu, tomonaka, ekesanaka mpenza na nyonso. Nzokande, nyonso mibale ezali milimo ya basámбели, nyonso mibale; moko, Molimo Mosantu; mosusu, molimo ya mbindo. Mpe soki botali malamú, eko, ata balobaka ete basambelaka, bakotiola yo mpe bakofinga yo motúntuki. Basalaka nyonso oyo bakoki kosala.

<sup>120</sup> Bango, batiolaka Liloba na Nzambe oyo e—ebongwanaka te, lokola soki Etikálá kokomama te.

Bomoni, okoki koloba: “Sikawa, bóyoka, soki—soki libatisi. . .”

“Nazali na Molimo Mosantu!”

“Mpe otelemi wana ná cidar wana na loboko, kobendáká yango?”

“Iyo, nazali na Molimo Mosantu! Ngai nandimaka te ete ezali mabe komela mwa moke. Ngai nandimaka te ete e. . .” Bomoni?

Mpe botalaki malamú: “*Ngai* nandimaka te”? Kasi Nzambe amoni ndenge mosusu, bomoni, kokokana na Liloba na Ye. Bomoni? Bomoni, ba. . . Oyo ba—bazali kosala, bazali mpenza ko—kobwakela Yango nsói. Ezali mpenza bongo.

<sup>121</sup> Kaka ndenge mwa ebosono wana, oyo azalaki komibenda na nsé, na ntango wana, ntango babenganaki Dawidi na ngbende na ye. Azalaki komata Ngomba ya Olive, azalaki kobima, koleláká wana azalaki komata, kobwakáká miso na nsima. Mwa ebosono oyo mpe abimaki kuna mpe azalaki kobwakela ye nsói. Mpe sinzili wana alobaki: “Nátika. . . motó ya mbwa yango étikala likoló ya mapeka na ye, mpe ábwakela mokonzi na ngai nsói boye?”

Dawidi alobaki: “Tika ye.” Bomoni, babwakelaki ye nsói.

<sup>122</sup> Pene na mibu nkama mwambe nsima na yango, babwakelaki mpe Mwana na ye nsói, Yesu Klisto.

Mpe lelo, bazali lisusu kobwakela Ye nsói. Lokola Ezalaki ata te. . . Bazáangi limemia, batioli, bakobalola elongi mpe bakopesa Yango mokongo, mpe bakoseka yo na miso na yo mpenza. Mpo na nini? Bazali na masuwa oyo ezali kokende na Talasisi. Ezali mpenza bongo.

Mbela oyo epai na Nzambe, osengeli kogángela mabe, kogángela lisumu, kogángela makambo ya lokuta. Sikawa, bómikanisela, ekosalema.

He, boyebi, ngonga oyo. Boyebi, nazali na ngonga mibale ya bokeseni. Na Tucson, ezali naino ngonga ya nsambo na miniti zomi, mpe—mpe nabandi komona lokola—lokola ezali lisusu esika na ngai te awa. Hah? Malamu.

<sup>123</sup> Sikawa, bómikanisela, tokosengela kopesa eyano mpo na likambo yango. Bómikanisela, baoyo babwákeláká Klisto nsói bakopesa eyano mpo na likambo yango.

Ntango Dawidi azongaki longwa na ekimelo na ye, ntango azalaki mokimi, mpe ntango azongaki, bomikanisela, moto yango akweiaki elongi na nse mpe asengaki ete bá yokela ye mawa. Abwakelaki Dawidi nsói, ntango azalaki kobima, kasi abelemaki mpo na kosukola ye makolo ná mpisoli, ntango azongaki.

Mokolo moko, baoyo batobolaki Yesu bakomona yango.

Mpe baoyo bazali kotobola Ye lelo oyo, bakomona yango mpe. Bango, mokolo moko, ekozongela bango. Bómikanisela, Emoniseli 22, Asengi na biso ete tótosa Liloba moko na moko oyo Asilá kokoma; Liloba moko na moko.

<sup>124</sup> Sikawa toyebi ete Bozali na Ye ezali awa. Etatolami. Tozali na yango. Totii motema ete na mposho oyo ezali koya, ekokoba kotatolama katikati na biso; babeli bakobika, mpe makambo ya minene ekosalema.

Tozali na mposa ya likanisi eyebani na bato ebele te. Tolingi nde Solo. Mpe tolingi te, biso (tolingi) tolingi te ko—tolingi kondima eloko mosusu te, bobele oyo Nzambe alobi ete ezali Solo. Kasi: “Yeba malamumu ete masumu na yo ekokanga yo ntango nyonso.” Soki ekangi yo awa te, ekokanga yo na Kosambisama. Boye, ozali—ozali. . . Ekokanga yo esika moko, sikawa. Iyo, mesié.

<sup>125</sup> Kasi soki ozali Moklisto ya solo, oyo abengami mpenza lokola Yona, Nzambe asilá kofuta tiké na yo. Kita na masuwa wana oyo ezali kokende na Talasisi, ata bongo. Nzambe abongísaki yo liboso mpo na bomoi oyo. Iyo, mesié. Soko ozali mwana na Nzambe ya solo, oyo abéngami, yaka epai na Klisto. Kóta na kati ya litondi na Ye. Tiké na yo esilá kofutama mpo na kokende wapi? Efutami mpo na kokende na Niniwe, na Talasisi te. Osilá kobongisama liboso. Masuwa na yo. . . Masuwa moko ezali kolongwa sikawa, ezali na nzela. Boye, eloko ya kosala ezali

kaka moko, ezali ete ókota. Mpe soki ozalaki lokola Nzambe, okotikáláká kozala na kimia te. . .

<sup>126</sup> Lokola mwana-mobali ya ndeko na ngai, eleki kala mingi te. Ekokisi pene na mibu zomi sikawa, oyo azali kotelengana. Na ntongo moko, akei na losambo oyo, na lingomba Katoliko oyo ya awa, mpe akomi kuna mpo na oyo tata mosantu moko alobi awa, mpe oyo mosusu alobi *awa*, mpe mosusu alobi *awa*. Nyonso wana emeni na nini? Bomoni? Sikawa azali naino na nzala mpe mposa. Nalobaki: “Esika na yo ezali na etumbelo kuna, mwana.” Bomoni?

Nzela ya kokíma yango ezali ata moke te. Soki Nzambe azali kolanda yo, malamú ómipesa mpe ókende liboso. Esili.

<sup>127</sup> Bómikanisela, Nzambe! Malamú, Nzambe azalaki na kati ya masuwa. Nzambe azalaki na kati ya mopepe makasi. Nzambe azalaki na kati ya mbisi. Epai nyonso azalaki kobaluka, Nzambe azalaki wana.

Bomoni, Nzambe azali kuna, mpe ekokoba kaka kolanda yo. Boye, mpo na nini kozela ntango molai? Tóbanda mayangani ya kolamuka oyo na ndenge esengeli. Ya solo! Bozali kozela nini? Tondimi ete Boyei na Nkolo ekómi pene, mpe Akozua Mwasi na libala moko, mpe Yango elengelami. Mpe biso tolingi masuwa moko te ya kokende na Talasisi moko. Tozokende na Niniwe. Ha! Tozokende na Nkembo. Amen. Ya solo. Tozokende epai Nzambe akopambola, mpe yango nde eloko oyo tolingi kosala.

<sup>128</sup> Kotikala Liboso na Nzambe, na bongo, ná mitema na biso; maboko na biso mpenza te, kasi mitema na biso liboso na Nzambe, kino Ákótisa na kati na biso, na ndenge nyonso, ndenge wana, elengi ya bongengi ya nkembo na Ye, mpe Álámba boboto na Ye—na Ye na kati na biso, mpe Ákomelisa oyo tozali na yango, mpo ékoma eloko ya solosolo, bomoni, na lolenge ete tókoka kolakisa na bamosusu ete Yesu Klisto azali na bomoi. Oh, la la! Tolingi kondima yango.

<sup>129</sup> Mpe bómikanisela, bisika nyonso oyo Yona akendeki, Nzambe azalaki kati na masuwa; Nzambe azalaki kati na mopepe makasi; Nzambe azalaki kati na mbisi. Akobaki kolanda Yona kino ntango mokano mobongi be na Ye esalemaki. Ya solo.

Mpe soki Azali kolanda yo, okoki kokíma *awa*, mpe kokíma *kuna*, kasi okozala moto na mawa soki ozongi te mpo na kosala likambo oyo obandaki kosala mpo na Ye na ebandeli. Bomoni? Bokende te, bókima longwa na Bozali na Nzambe te. Bókutana na yango. Soki ondimi ete ezali Solo, na bongo bótika. . . Soki ezali Solo, ebongi kobika mpo na yango, kokufa mpo na yango, mpe nyonso mosusu. Mpe soko Asílí kotatola yango epai na yo, ete ezali Solo, na bongo, tokoki kokíma yango te, esika moko te. Akozala bobele wana, ndenge moko. Okoki kosala yango te.

<sup>130</sup> Na nzela ya mosakoli na Ye apesaki, oyo Ye abongisáki mpo na kokende kuna mpe koteya nsango yango, sikawa, emonanaki lokola Akokaki kotinda mosakoli mosusu, kasi Abongisaki nde Yona, mpe, ata Eliya alingaki kokoka kosala yango te, Yilimia alingaki kokoka kosala yango te, Mose alingaki kokoka kosala yango te, Yona moto asengelaki kokende na Niniwe. Esuki se wana. Atindaki ye mpe Ayebisaki ye ete ákende. Mpe ntango Alobi: “Kende kuna, Yona, kende na Niniwe,” moto mosusu akoki kokende kosala yango te, kaka Yona.

Mpe ntango Nzambe ayebisi yo likambo, yo moto osengeli kosala yango; moto mosusu te. Bomoni, tosengeli kondima yango, mpe, mpe kokende kosala yango.

<sup>131</sup> Tondimi ete tozobika na eleko oyo Nzambe azali kosala eloko moko. Tondimi ete tozali kobika katikati na bango sikawa. Nandimi ete, na mpokwa oyo, nazali koteya na losambo yango, oyo—oyo ezali wana, kozeláká ékomela. Na—nandimi yango mpenza, na motema na ngai mobimba. Nakoki koloba ete ezali motindo moko sikawa, ndenge ezalaka ntango nyonso.

<sup>132</sup> Sikawa, tondimi ete ngonga esili kokoma, oyo Santu Yoane 14:12 esengeli kokokisama. Bisó, tondimi ete Malaki 4 esengeli kokokisama. Tondimi ete Luka 17:30 esengeli kokokisama. Tondimaka yango, ete masakoli nyonso oyo Ye alobaki ekokokisama lelo oyo. Tondimi ete esengeli kokokisama, mpe tondimi ete tozomona yango kokokisama sika-sikawa. Ezali mpenza bongo.

<sup>133</sup> Bótika kokima. Bólongwa na Bozali na Ye te; bókota nde na Bozali na Ye. Ya solo. Mpe nayebi ete yango nde bozali na mposa ya kosala. Mpamba te, namoni ba-numero ya mituka ya Texas, ya Louisiana, mpe ya bisika ndenge na ndenge. Yango nde ntina oyo tozali awa, ezali te mpo na kokíma longwa na Bozali na Ye, kasi kokíma na kati ya Bozali na Ye.

Bózonga, bókita na . . . [Maloba mazangi na eteni oyo ya bande—Mok.] . . . azalaki Yona, soki ozalaki komituna nzela nini ya kokende to eloko nini ya kosala, yaka, kota na masuwa elongo ná biso na mpokwa oyo. Bisó tozokende na Talasisi, mpo na kogánga . . . na Niniwe, nde, mpo na kogánga. Totiki masuwa ya Talasisi wana ékende na talango kuna, soki balingi. Bisó tozali na lotomo liboso na Nzambe, oyo ezali, Nsango moko, oyo tozali na mokumba na yango.

<sup>134</sup> Boye, na mpóso oyo ezali koya, mpokwa oyo ezali kaka mwa ebandeli, mpo na koyebisa bino. Ntango nazogánga, bandeko, ngai moko nde nazali na mokumba ya Nsango moko. Bino batei oyo bofandi awa, nazali awa te mpo na koyokisa bino mpasi. Mpe bino basi ná mibali, mpo na likambo ya libala mpe koboma libala oyo ezali koya, nalingi ete bómikanisela, na mpokwa oyo. Nalobi nyonso oyo, mpo náyebisa bino likambo oyo, ete nazali na mokumba kaka epai na Nzambe.

Mpe, lisusu, nazali na mokumba na bino, mpo na koyebisa bino Solo. Mpe nakoyebisa bino eloko mosusu te, bobele Solo, na ntango nyonso oyo Nzambe akoyebisa ngai oyo Solo ezali. Soki nayebi naino Solo te, nakoloba eloko moko te na ntina na yango, bomoni, nakoloba eloko moko te na ntina na yango. Kasi nandimi mpenza ete Nzambe atalisi ngai Solo na ntina na *Libala Mpe Koboma Libala*, mpe natii motema ete Akopesa ngai nzela ya kotalisa yango.

<sup>135</sup> Mpe Mateya mosusu oyo nakanisi koteya na mpóso oyo, ezali, *Melikisedeke Oyo Azali Nani? Nzambe Aponaki Kotia Nkombo na Ye Wapi?* Ná makambo mosusu ya ndenge wana, ezali Mateya oyo ezali koya, ná *Mpasi Ya Kobota*. Mpe—mpe makambo mosusu, ya—ya ndenge wana, oyo ekobakisama likoló na *Mobali Oyo Azali Kopona Mwasi Na Ye*. Mpe makambo mosusu, Mateya yango, oyo nalingi koteya na mpóso oyo. Kasi nalingi kaka ete losambo. . .

<sup>136</sup> Bongo, soko motei moko azali awa; ngai nazalaka awa te, bandeko na ngai. . . Nalingi te ete bino, to bandimi mosusu kati na bino, bázonga na losambo na bino, mpe báloba: “Ndeko Branham alobaki *boye na boye*.”

Nakangami na mokumba ya Nsango oyo epesameli ngai na Nzambe na-Nguya-nyonso. Ndenge natelemi awa na mpokwa oyo, mpe Nzambe ayebi ete ezali solo, ete awa, na ebale oyo. . . Ntango mosusu, bato mosusu bazali awa, ntango Mwanje na Nkolo akitaki kuna mpe ayebisaki ngai makambo oyo Ayebisaki ngai, kuna, na mobu 1933, awa, na Balabala Spring awa. Soki ozali mopaya awa, lándá kaka balabala oyo. Ezali na litumu ya Balabala Spring, kuna, esika ekutani ná ebale, ezali na esika oyo yango esalemaki. Esalemaki na mobu 1933. Esili koleka ntango mosusu mibu soko ntuku misato na mibale, kobanda wana. Oh, eleki mibu ntuku misato na- . . . eleki mibu ntuku misato na- . . . ntuku misato na mibale, ntuku misato na mibale.

Mpe komona ndenge oyo Akokisi yango mpenza, na mobimba. Mpe tobimaki kuna mpo na koteya Nsango yango, mpe tomoná babeli kobika, bakufi-miso, bibósono, batengumi, bakakatali, mpe babeli ná nyonso wana. Mpe tomoni ata bakufi, oyo toyebi etalisamaki ete bakufaki mpenza, kosekwa longwa na bakufi. Bato kokufa, mpe kozonga mbala moko lisusu na bomoi, ná makambo nyonso wana. Soki Nsango moko esakolami, ezalaka na bilembo ná bikamwa!

<sup>137</sup> Kasi bozali naino komona lolenge ya makanisi ya kala wana, oyo bozalaki na yango? Eutaki na Nzambe te. Nzambe azalaka kaka na ntina te ya kosala. . .

Nzambe azali koluka kobenda bokebi na bino na Eloko moko.

<sup>138</sup> Na bongo, ntango Yesu abimaki, Abandaki kobikisa babeli, mpe kosala misala ya minene mpe nyonso wana. Ye, ntango

nyonso, Ye. . . Yesu asalaki yango. Mpe Mose ná Yesu basalaki yango, ná baoyo nyonso batikali. Ntango Azalaki awa, Asalaki yango.

Mpe Azali kosala yango, ndenge moko lelo. Ntango Ye atindaka mayangani ndenge wana, mayangani ya kolamuka, mpe abandaka liyangani moko na mokili, abandaka kosala mosala ná bilembo minene mpe bikamwa oyo. Na nsima bomoni, bazongaka na eteyelo ya kala moko wana ya malakisi, ezali—ezali na eloko moko oyo ezali kotambola malamau te esika moko wana. Eloko moko ya sika ezali koya! Ntango Yesu ayaki, na nsima, ntango. . .

<sup>139</sup> “Azali Rabi malamau.” Akokaki kokende na eteyelo nyonso mpe koteya, ntango Azalaki kobikisa babeli. Ntango, oh, bazalaki kosepela koyamba Ye kuna.

Kasi mokolo moko, ntango Ye afandaki, mpe alobaki: “Ngai ná Tata na Ngai tozali Moko,” ndeko, bazalaki lisusu kosepela na Ye te, nsima na yango. Ntango Alobaki: “Soko bolei nzoto na Ngai te, mpe bomeli Makila na Ngai te, bozali na Bomoi kati na bino te. Kasi ye oyo akolia nzoto na Ngai, mpe akomela Makila na Ngai, azali na Bomoi na seko; mpe Nakosekwisa ye na mokolo ya nsuka.” Na bongo, bazalaki lisusu kosepela na Ye te.

<sup>140</sup> Bazalaki koloba: “Moto oyo amelaka makila ya bato. Moto oyo azali Bezezebula. Wana nde ntina oyo Asalaka makambo wana. Ayébisaka bato makambo ya bomoi na bango. Atálaki mabanzo na—na bango mpe Asósolaki makanisi na bango. Azali moto na solóka.”

Kasi, likambo ezalaki ete, A—Azalaki Liloba na Nzambe oyo etalisami polele mpo na ngonga wana. Mpe Asengelaki kosala yango. Alobaki: “Nasalaka ntango nyonso makambo oyo esepelisaka Tata na Ngai.” Nzambe ásungá biso mpo tósalaka ndenge moko, kosala makambo oyo esepelisaka Tata.

<sup>141</sup> Mpe nazali kolikia ete bino nyonso bokososola. Soki bolongobani ná ngai te mpo na Mateya oyo ná makambo mosusu, nakanisi ete bokobósana yango te, bózála ata na limemia wana, ete nazali na mokumba moko, mpe nazali kokende na Talasisi te. Nazali na nzela mpo na kokende na Niniwe, mpe na—nasengeli kogánga. Nkolo ápambola bino nyonso.

Tóngumba mitó sikawa, mwa moke.

<sup>142</sup> Tokomi pene na ngonga ya libwa na ndambo. Nalingi koumisa bino te, kasi nalingi koyeba likambo moko, soki nakokoka, na mpokwa oyo. Ezali na bayike awa, oyo—oyo azali mpenza te na esika oyo osengeli kozala na kati na Klisto, kasi o—ozali na mposa ya kozala wana, mpe bolingi mpenza kozala wana, okolinga kotómbola loboko, koloba: “Ndeko Branham, bóndela mpo na ngai?” Nzambe ápambola bino, bójala maboko.

“Na—nalingi . . . Nazali awa, Ndeko Branham, mpo nábelema pene na Nzambe koleka.”

Mpe soki otombolaki motó, ngai mpe na—natomboli loboko. Yango nde ntina oyo nazali awa. Nazali na nzala, lokola yo.

<sup>143</sup> Kasi, oh, mokolo moko, moko na makambo ya minene koleka esalemaki, mpe na—nayebi sikawa likambo ya kosala. Mpe na—nabondeli ete Nzambe ápesa yo lisosoli wana ya polelé. Ezali wana. Mo . . . Soki motuna moko ezali na makanisi na yo, eyano moko esengeli kozala esika moko, mpo na koyanola na motuna yango. Libondeli na ngai ezali ete Nzambe ásala ete motuna yango ézua eyano na ntango oyo.

<sup>144</sup> Soko ozali na bokono, tika ete Nzambe abikisa yo. Tokozala na mayangani ya kobondela mpo na babeli, nabanzi, mpokwa nyonso, tóloba, mpe tokobondela mpo na babeli. Bisó tokosala nyonso oyo tokoki kosala mpo na kosunga bino, bino mpe bósala nyonso oyo bokoki kosala mpo na kosunga biso. Mpe tokosala mosala elongo, wana totii motema ete Nzambe akopesa biso mayangani ya nkembo.

<sup>145</sup> Sikawa, Tata Nzambe, mwa maloba ya biteni-biteni oyo, kasi ezali na maboko na Yo sikawa. Nkolo, yango esili kolobama. Nakosengela kokutana na yango. Kaka lokola . . . Maloba wana ekoki kokufa ata moke te; ezokende zinga-zinga na mabelé, na nzela ya ba-bande, mpe mokolo moko, nakosengela kokutana na yango lisusu. Nayebi yango malamú, Nkolo, mpe nazali koloba yango na bosembo nyonso.

<sup>146</sup> Nabondeli, Nzambe molingami, na mpokwa oyo, mpo na moko—moko na bango, bana na Yo. Mpe, E Nzambe, natii motema ete, liboso mpóso éсила, bako—bakosósola, ete motuna yango, oyo ezali na makanisi na bango na mpokwa oyo, ekozua eyano. Kokisa yango, Nkolo.

<sup>147</sup> Ezali na bamosusu awa oyo bayebi Yo naino te, Tata, lokola Mobikisi, to ntango mosusu batikálá kotondisama na Molimo Mosantu te. Tika ete oyo ézala mpokwa yango.

<sup>148</sup> Nkolo, ngai nakoki kotondisa moto moko te na Molimo Mosanto; nakoki mpe kobikisa moto te. Nakoki bobele koyebisa bango oyo Yo olobi: “Esengo na baoyo bazali na nzala mpe na mposa ya boyengebene, mpo bakotóndisama.” Mpe nabondeli, Nzambe, ete Okela nzala mpenza na mitema na bango.

Bato mingi, Nkolo, basengeli kozala na nzala; ndenge nini bakolinga kotambola ba-kilometre nkama na nkama, na kati ya glasse mpe nyonso wana, mpe na nsé ya mbúla na ba-ngómba, mpe kokatisa bisóbe, mpo na koya kofanda na mwa ndako moko ya kala, awa, na litumu! Bongo, nakanisi lisusu, Olobaki: “Esika Ebembe ezali, bampongo bakosangana.” Leisa biso, Nkolo, na Mana na Yo ya Bonzambe. Pesa na milimo na biso bilei oyo

tosengeli na yango mpenza. Tozali na mposa na Yo, Tata. Tozali na maboko na Yo sikawa.

<sup>149</sup> Tika ete Molimo Mosantu ya nkembo oyo ekitaki na ngomba mokolo wana, kuna, nabondeli ete Átondisa motema moko na moko oyo ezali awa, na bolamu mpe mawa na Ye, ná lisosoli. Tososoli, Tata, ete yango nde tozali na bosenga na yango, kosósola. Mpamba te soki toyebi te eloko nini tozali kosala, na bongo, ndenge nini tokoyeba lolenge ya kosala yango? Kasi tosengeli kozala na lisósoli. Ndenge Danyele alobaki, ete “asosolaki na nzela na Makomi ya mosakoli Yilimia.” Mpe, Tata, biso tosósoli na nzela ya Makomi ya Molimo Mosanto, ndenge Akomonisa biso Yango na ngonga oyo. Pesa biso, Nkolo, bamposa oyo tozali na yango mpo na Yo. Tosengi yango na bopolo nyonso, Tata, mpo na nkembo na Yo, na Nkombo na Yesu Klisto.

<sup>150</sup> Sikawa, wana togumbi mitó. Wana ndeko na biso ya mwasi azali kobeta loyembo oyo: “Ye akopesa ngai ngolu mpe nkembo, mpe akotambola elongo na ngai kino na nsuka.” Nalingi ete bóbondela na kimia mpenza, sikawa, mpe bósenga na Tata na Likoló ete Ápesa bino, na mpokwa oyo, oyo bozali na bosenga na yango.

<sup>151</sup> Molingami ndeko mobali, molingami ndeko mwasi, Azali mpenza pembeni na yo, kaka ndenge loboko na yo ezali. Bino, bondimelaka ngai na—na makambo mosusu, bóndimela ngai na oyo. Azali awa mpo na kopesa bino nyonso oyo bozali na bosenga na yango.

<sup>152</sup> Oh, na mwa bampóso oyo euti koleka, nazalaki na nzala makasi, na mposa makasi, na mposa makasi ya kozonga na ndako, mpo na komona bino. Yango wana nalobaki: “Billy, tózonga epai na biso.”

Meda alobaki: “Mpo na nini olingi kozonga kuna, na etúka ya malili wana, Bill? Epesaka yo ntango nyonso mpasi na mongongo mpe nyonso wana. Okómaka ntango nyonso na miyoyo, mongongo ebebaka, mpe okokaka lisusu koloba malamú te.”

<sup>153</sup> Nalobaki: “Ee, nayebi te.” Nalobaki na ye... Namoni moninga na ngai, Charlie Cox, afandi kuna. Nalobaki: “Nazali na mposa makasi ya koyoka Charlie koloba: ‘Mwa esende yango emataki na nzete oyo kuna.’ Nakomi na nzala makasi ya koyoka yango.” Na—nalingi kaka ko—kozala pembeni ná bino.

<sup>154</sup> Nayebi ete Ndeko na ngai Banks abélaki makasi. Mpe namonaki ye na emononeli, awa, eleki ntango molai te, alalaki na mokongo na ye. Mpe nayebi ete etikalaki moke ete átika biso, na mikolo euti koleka. Ntango natalaka moko na moko bino. . .

<sup>155</sup> Nakómaki awa mokolo wana na mpokwa, na liyangani ya ba-Homme d’Affaires Chretiens mpe ya mokili mobimba. Mobange “Pop” Shakarian, tata ya Demos, azaláká kofanda



kuna mpe azalaki kaka kotala kino ntango nakokota, na bongo, akoseka, mpe akopepa ngai mbote na mosika. Azalaki wana te. Asili kokende.

Na nsima, nasengelaki kokende na libota wana, ná YANGO ELOBI NKOLO, mwana na bango ya mwasi mpe azali kobunda na liwa. Florence, namonaki ye na emononeli, namonaki ye kokende. Mpe nayebi ete azali kokende. Mpe nalobaki: “Bondela, bondela kaka. Boyebi, ezali na . . . Mosakoli moko, mokolo moko, bayebisaki ye ete ákende koyebisa mokonzi moko ete atia ndako na ye na molongo. Abondelaki, mpe Ye abatelaki bomoi na ye, mibu zomi na mitano lisusu.” Nalobaki: “Bondela.”

<sup>156</sup> Kasi, bó тала, mpe na—nazongaki awa . . . Nafandaki awa, na restaurant moko, mokolo mosusu, nazalaki kolia. Mobali moko ayáki pembeni na ngai, alobaki: “Yo nde Billy Branham, boye te?”

Nalobaki “Iyo.”

<sup>157</sup> Ntango mosusu ayebaki ngai te, mpo na eloko *oyo* ezipaka esika ya libandi oyo, na motó na ngai. Nalataki mwa eteni ya nsuki oyo, mpo na ná zua mpasi na mongongo te na liyangani oyo.

Ayaki pembeni na ngai, alobaki: “Nakanisaki ete nayebi yo, Billy.”

Nalobaki: “Iyo.” Nalobaki: “Yo nani?”

Alobaki: “Ngai nde John Warman.”

Nalobaki: “Boni Zip?”

Alobaki: “Billy, akufá.” Uh!

<sup>158</sup> Nalekáki na ndako ya esambiseli; nakendeki kofuta bampako na ngai. Ntango nalekaki na ndako ya esambiseli, mwasi moko abelelaki ngai, mpe nalobaki: “Oyebaki ete John akufá?” To, nkombo moko boye. Ntango mosusu ezalaki John te; Ed, to eloko moko boye. Mpe nalobaki . . . Nayebaki mwasi yango te. Nayokaki mwa soni. Mpe sukasuka amonaki ete nazalaki koyeba ye te.

Alobaki: “Oyebi lisusu, mokolo moko na molili ya butu, ntango ebale etondaki kino na libongo awa, mpe bandako ezalaki kokumbama, kuna na Balabala Chestnut, mpe otiaki bomoi na yo na likáma mpo na kokota na ndako moko mpe obimisaki mwasi moko ná bana mike?”

Nalobaki: “Ezalaki yo?”

<sup>159</sup> Alobaki: “Ngai—ngai nde mwasi yango.” Abandáki kolela mpo na mwana na ye; boyebi lisolo na ngai. Alobaki: “Mwana yango, oyo nazalaki kobenga ‘bébé na ngai,’ abálá mpe akómá na libota.” Bomoni? Mpe ye oyo, mobange ná nsuki ya mpembe; ngai mpe ngai oyo.

<sup>160</sup> Moko na moko, ba-kálati na biso ezali kolongwa na libóké yango. Mpe ntango tozalaka na mayangani, namonaka ete

*songolo* azali lisusu te, *pakala* azali lisusu te. Esengeli na biso nyonso kozala lisusu te, moko na mikolo oyo.

Kasi, ndeko mobali, ndeko mwasi, Esika ya kosangana moko ezali. Tondimisama sikawa ete tozali na molongo. Bokolinga kosala yango? Tótika te ete lisosoli na biso mobimba ya Nzambe, mpe bongo na bongo, ekwea na mai. Tika tóndima.

<sup>161</sup> Tata, bazali na maboko na Yo. Nazali na maboko na Yo, Nkolo. Tozali awa bobele mpo na komibulisama sikawa, liboso na liyangani oyo ezali koya, kobanda lobi na mpokwa. Okolinga kosunga biso, Nkolo? Tika ete—tika ete masolo na biso ézala ntango nyonso likoló na Yo! Tika ete mitema mpe makanisi na biso étiámá likoló na Yo, mpe Olobaki ete Okobatela biso na kimia oyo ebongi be. Ekomami mpe na Biblia: “Komipesa na mayele na yo moko te.” E Nzambe, toboyi lisosoli na biso; tolingi lisosoli na Yo. Pesa biso yango, E Nzambe. Mpe tika ete kolamuka ékota na kati na milimo na biso, na lolenge ete etonga ya bato oyo bákóma na motema moko mpe boyokani moko. Pesa yango, Tata. Pesa biloko yango, wana tobondeli na Nkombo na Yesu Klisto.

Kino elimo na ngai enetolami ekozua  
Kopema na ngámbo ya ebale.

Na ekulusu, na ekulusu,  
Zala nkembo na ngai. . .

Tótombola maboko.

. . . libela;

Kino elimo na ngai enetolami ekozua  
Kimia na ngámbo ya ebale.

Yesu, bátelaka ngai na ekulusu,

Liziba moko ya motuya ezali,

Ya ofele. . . (Iyo, Nkolo, ya ofele.) . . . mai ya  
lobiko,

Ezali kotiola uta na Liziba ya Kalvari.

Na ekulusu, na ekulusu,

Zala nkembo na ngai mpo na libela;

Kino elimo na ngai enetolami ekozua

Kimia na ngámbo ya ebale.

<sup>162</sup> [Ndeko Branham azali koyemba na nse ya mongongo *Pene Na Ekulusu*—Mok.] E Nzambe! Soki ezali na bamosusu kati na bino oyo bayoki mposa ya koya kofukama awa na etumbelo, soki bokolinga koya, koloba: “Nazali te na esika oyo nasengeli kozala, Nkolo. Na—nalingi komibulisa lisusu. Nalingi kosala yango na mpokwa oyo, Nkolo.” Bokoki koya. Tokozala awa mpo na kobondela elongo na bino.

Na ekulusu, na ekulusu,

Oh, zala nkembo na ngai mpo na libela;

Kino elimo na ngai enetolami ekozua

Kimia na ngámbo ya ebale.

Yesu, bátelaka ngai pene na ekulusu,  
Liziba moko ya motuya ezali,  
Ya ofele mpo na moto nyonso, mai ya lobiko,  
Ezali kotiola uta na Liziba ya Kalvari.

Na ekulusu, na ekulusu,  
Zala nkembo na ngai mpo na libela;  
Kino molimo na ngai enetolami ekozua  
Kimia na ngámbo ya ebale.

<sup>163</sup> Tóbondela, moto na moto na lolenge na yo moko sikawa. Bó—bósana ntango. Togumba mitó Liboso na Ye. Mwasi ya moke oyo awa, oyo azali koganga: “Nalingi Yo, Yesu!” Ozoyeba lisusu ntango obikisamaki, eleki mibu ebele, ozoyeba lisusu ndenge ezalaki na boboto mpo na yo? Azali kaka na boboto yango na mpokwa oyo. Tóbondela, moto na moto na lolenge na yo moko sikawa. Tika ete—tika ete biso nyonso tomibulisa epai na Nzambe, tomipesa mpenza na Nkolo.

<sup>164</sup> Molingami Nkolo Yesu. . . [Maloba mazangi na eteni oyo ya bande—Mok.]

Liziba ya kobondisama na ngai nyonso,  
Koleka bomoi mpo na ngai,  
Nazali lisusu na nani na mokili soko Yo te?  
To nani na Likoló soki Yo te?

Nzambe molingami, tobondeli sikawa ete mawa mpe ngolu na Yo étindama likoló na moko moko na biso nyonso, Nkolo. Toyei awa zinga—zinga na etumbelo. Ebele bakoki kokoma awa te; Okokutana na bango na bisika bafándi. Nyonso oyo topesaka, Nkolo, Obelemaka mpo na koyamba yango. Soki topesi Yo ntango na biso, Okoyamba yango; likabo, Okoyamba yango. Kasi, Nkolo Nzambe, na mpokwa oyo, biso tokei mosika koleka oyo wana, tozopesa nyonso oyo biso tozali. Nyonso oyo nazali, nyonso oyo naluká kozala, nyonso ezali kati na Yo, Nkolo. Tobondeli ete Óyamba oyo, mabondeli na biso, na motema na Yo, Nkolo, mpe pésa biso bozindo monene ya Molimo Mosantu, mpo bomoi na biso ébongwana. Mpamba te, tomoni ete tokómi pene na nsuka sikawa. Ekoki lisusu koumela mingi koleka te. Mpe wana tozali komona balingami na biso kokende, mokolo na mokolo, bilenge ná mibangé, toyebi ete, kala mingi te, esengeli kobeta ekuke na biso. Mpe na mpokwa oyo, Nkolo, wana tozali na mayele na biso nyonso, tofandi awa, to tofukami awa, to totelemi awa, ézala na esika nini tozali, yambá biso, Nkolo Nzambe.

<sup>165</sup> Zua ngai, Nkolo. Nazali eloko mpamba, kasi, nyonso oyo ngai nazali, Nkolo, soko Okoki komona eloko ya kosalela moko kati na ngai, namibulisi epai na Yo.

<sup>166</sup> Nabondeli, Nzambe molingami, mpo na moko na moko na bato oyo. Bato ya motuya oyo, ntango nazalaki kuna na bangomba ya Arizona, nalelaki mpo na bango, mpe bango oyo,

bafukami liboso na etumbelo elongo na biso na mpokwa oyo, tozali kobondela, kobulisa bomoi na biso. Tolingi Yo, Tata, koleka bomoi na biso moko. Tolingi Yo koleka mabota na biso. Tolingi Yo koleka mwasi, bana, tata, mama, ndeko mwasi, ndeko mobali, mobali, mwasi. Tolingaka Yo, Nkolo Yesu. Sálá ete ékoma mpenza likambo ya solo na mitema na biso, Nkolo. Sopá mafuta ya esengo na milimo na biso, na mpóso oyo, Nkolo. Sukola biso, pétola biso na Liloba, na mai ya Liloba, wana Ozali kokabolela biso Solo.

<sup>167</sup> Bato mingi oyo bazali awa na mpokwa oyo, Nkolo, ná baoyo bakozala awa, bazali na mobulu na ntina na makambo ya motuya oyo. E Nzambe, fungóla na ndako na Nzambe liziba yango, oyo—oyo ezali wana mpo na kopetola biso. Nabondeli, Nzambe, ete Osukola biso mpe Ópétola biso na Makila na Yo, mpe Ókómisa biso bikelamu ya sika. Mpe pesa biso ngolu mpe makasi, mpo na koteya Liloba ya Solo na emoniseli na Yango ya Bonzambe ya Ezali ya Yesu Klisto.

Tika ete Ámonana liboso na biso, Nkolo. Tika ete Áya kobikisa bokono na biso, kolimbisa masumu na biso, tondisa mitema na biso, oyo ezali na nzala, na nsango-malamu ya esengo monene, Nsango-malamu oyo etalisami na bomoi na biso.

Pambola mokengeli nyonso, moyembisi nzembo nyonso, molakisi nyonso ya eteyelo ya Lomingo. Pámbola biso nyonso, elongo, Nkolo, mpamba te tolingaka Yo mpenza. Sikawa tozali ya Yo, Nkolo, na komibulisa oyo. Na Nkombo na Yesu Klisto, sálela biso sikawa kokokana na mokano na Yo Moko.

Kondima na ngai etaleli Yo,  
Yo Mwana-mpate ya Kalvari,  
E Nzambe Mobikisi;  
Sikoyo yoka ngai wana nazalí kobondela,  
Longola masumu na ngai nyonso,  
E tika ete kobanda lelo  
Nákóma mobimba wa Yo!

Bolingaka yango? Tóyemba lisusu.

Ezali ngai kotambola na molili ya bomoi,  
Mpe mawa ezingi ngai,  
Oh, Yo zala Mokambi na ngai;  
Tika ete molili ékóma pole,  
Longola mpisoli ya mawa,  
Kotika te ete nábunga lisusu  
Mosika na Yo.

Ezali kosala ete bómiyoka malamú? Bato boni balingaka koyemba ba-nzembo oyo ya kala? Ngai nalingaka yango mingi. Bino mpe?

Oh, tozali kokende na Siona,  
Siona ya kitoko, kitoko;  
Tozali kotambola na nzela ya Siona,  
Engumba kitoko wana ya Nzambe.

Oh, tozali kokende na Siona,  
Oh, Siona ya kitoko, kitoko;  
Tozali kotambola na nzela ya Siona,  
Engumba kitoko wana ya Nzambe.

Boya, biso baoyo tolingaka Nkolo,  
Mpe tika ete esengo na biso éyebana,  
Yemba elongo na biso loyembo ya boboto,  
Yemba elongo na biso loyembo ya boboto,  
Na bongo ézingela Ngwende,  
Na bongo ézingela . . .

Sikawa, tótelema sikawa, wana tozali koyemba yango.  
Tópesana mbote ya loboko.

. . . kokende na Siona,

Ápambola yo, ndeko mwasi! Ápambola yo, ndeko mwasi!  
Ápambola yo, ndeko mobali! Ápambola yo, ndeko mwasi!

Engumba kitoko wana ya Nzambe.

Tótombola maboko likoló sikawa epai na Nzambe.

Oh, tozokende na Siona,  
Siona ya kitoko, kitoko;  
Tozotambola na nzela ya Siona,  
Engumba kitoko wana ya Nzambe.

Oh, tozokende na Siona,  
Oh, Siona ya kitoko, kitoko;  
Tozotambola na nzela ya Siona,  
Engumba kitoko wana ya Nzambe.

Ezali kosala ete bómiyoka malamú mingi, boye te? Oh, la la! Oh, tótombola maboko mpe tósanzola Ye na ndenge na biso moko.

<sup>168</sup> Nkolo Yesu, Yo Rose ya Saron, Fololo ya Lobwaku, Monzoto Mongengaka na Ntongo, Oyo-aleki-kitoko kati na bato nkóto zomi mpo na elimo na ngai. Yo Liziba ya libóndisi na ngai mobimba, koleka bomoi mpo na ngai! Tolingi Yo mingi! Yoka biso, E Nkolo. Totondi Yo mpenza! Oh! [Maloba mazangi na eteni oyo ya bande—Mok.] Tokosanzola Yo mingi! Pámbole bango, Nkolo mpe Mobikisi na biso ya motuya! Kokisa yango, Nkolo. Kokisa yango . . . ? . . .

. . . pene na ekulusu,  
Zala nkembo na ngai mpo na libela;  
Kino ntango elimo na ngai enetolami ekozua  
Kimia na ngámbo ya ebale.

<sup>169</sup> Na lolenge moko to mosusu, nazomona lokola toko . . . Eloko moko ezali liboso na biso awa. Sikawa, bóbosana te, nandimi ete nazali kosakola. Esengo monene ezali liboso na biso. Bondima yango. Ya solo. Mitema mingi oyo etondi na mawa eko . . . Mabombami minene ekotalisama polele, mpe bato oyo bazali na mawa bakosepela.

Pene na ekulusu, na ekulusu,  
Zala nkembo na ngai mpo na libela;  
Kino elimo na ngai enetolami ekozua  
Kimia na ngámbo ya ebale.

<sup>170</sup> Lokola Yoane ya kala, ntango akómaki mobange mingi mpe akokaki lisusu koteya te, bayebisaki ngai ete azalaki kaka kofanda mpe kogánga na makasi na ye nyonso ete: “Bana mike, bolingana kati na bino!” Bolingana moko na mosusu. Bótika te ete eloko moko ékota katikati na bino, bomoni. Bósala ete nyonso ézala mosika na . . . Iyo, ézala likambo nini, bókutana na yango. Tozali kokende na Niniwe. Bomoni? Bókota na masuwa wana ya kala te, oyo ezali kokende na Talasisi, ekomema bino libanda na boyokani. Tómata na liziba ya mapamboli ya Nzambe. Nandimi ete tokozua yango. Nandimaka Tata na biso.

<sup>171</sup> Okomi komiyoka malamú sikawa, ndeko mwasi? Ezali malamú. Ndenge wana nde nasepelaka komona bana kobotama, kobima ndenge wana.

Nazali komikanisela, eleki mibu, kaka na esika oyo, nkóto boni ya bato babótami na Bokonzi na Nzambe, kaka na esika oyo. Tozalaki mpenza koyeba te, ntango tozalaki kotelema awa ná ba-centime ntuku mwambe na libenga na biso, mpo na kotonga ndako-a-nzambe ná yango! Oh, Alobaki: “Ngai Nkolo Naloni yango; Nakomwangisela yango mai butu moi.” Mpe Asali yango. Asali yango.

Nzambe ápambola bino. Sikawa, wana togumbi mitó . . .

<sup>172</sup> Sikawa, lobi na mpokwa, bóbosana te, mayangani ekosalema na auditorium ya eteyelo oyo awa. Mpe soki . . . Tokotia moto moko awa, mpo na kolakisa bato ndenge ya kokóma kuna, mpo bato ya sika mpe bakoya.

<sup>173</sup> Soko bolingaka Ye, bóloba: “Amen.” [Losambo balobi: “Amen.”—Mok.] Oh, Azali malamú mingi, boye te?

<sup>174</sup> Nazalaki ya kotelema awa na libóngo, mpe nazalaki koyemba loyembo wana ya kala:

Natelemi na libongo ya Yaladene na mopepe  
makasi,

Bókanisa, mibu ntuku misato esili koleka, ntuku misato na misato, mibu ntuku misato na misato esili koleka.

Mpe nabwaki miso mosika,  
Na mabelé kitoko mpe ya esengo ya Kanana,  
Epai bozui na ngai ezali.

Mpe ebele oyo nabatisaki, na mpokwa wana, bazali na ngámbo kuna sikawa. Ntango, bazalaki wana mpe bamonaki ndenge Monzoto ya Ntongo yango ezalaki kokita uta na likoló, kozunguluka ndenge wana, elobaki: “Ndenge Yoane Mobatise atindamaki mpo na koteya, mpo na kolengela boyei ya liboso ya Klisto, Nsango na yo ekolengela Boyei ya mibale.” Ndenge nini moto akokaki kokanisa yango? Kasi, Maloba nyonso ya Nzambe ezali solo, Maloba nyonso ya Nzambe. Tozali kobika Liboso na Mokonzi monene. Nzambe ápambola bino.

<sup>175</sup> Wana togumbi mitó, nakosenga na Ndeko Neville, mokengeli na biso ya motuya, ete áyá awa mpo na kosilisa losambo na libondeli.

Nzambe ápambola yo, Ndeko Neville.



*MOTO OYO AZALI KOKIMA LONGWA NA BOZALI NA NKOLO* LIN65-0217  
(A Man Running From The Presence Of The Lord)

Liteya ya Ndeko William Marrion Branham oyo, eteyamaki liboso na Anglais mokolo ya Misato na mpokwa, mwa 17 na sanza ya Mibale, na 1965, na Branham Tabernacle na Jeffersonville, Indiana, U.S.A., ekamatamaki uta na bande pe ekomamaki mobimba na Anglais. Ndimbola ya Lingala oyo ekomami pe ekabolami na Voice Of God Recordings.

LINGALA

©2023 VGR, ALL RIGHTS RESERVED

VOICE OF GOD RECORDINGS  
P.O. BOX 950, JEFFERSONVILLE, INDIANA 47131 U.S.A.  
[www.branham.org](http://www.branham.org)



## Liyebisi ya makoki ya mokolo-eloko

Makoki nyonso ekopesama na ndingisa. Búku oyo, ekoki kozala imprimé na masíni ya ndako mpo na yo moko to kokabama, ofelé, lokola esalelo mpo na kopalanganisa Nsango Malamu ya Yesu Klisto. Búku oyo ekoki kotekama te, koyíkanisama te, kotiamana na site internet te, kobombama mpo na kolukaluka te, kolimbolama na nkota mosusu te, to kosalela yango mpo na kosenga misolo te, kozanga ndingisa ekomami mpenza na Voice Of God Recordings®.

Soki olingi koyeba makambo mosusu to kozua bisalelo mosusu, komélá:

VOICE OF GOD RECORDINGS  
P.O. Box 950, JEFFERSONVILLE, INDIANA 47131 U.S.A.  
[www.branham.org](http://www.branham.org)